

ASO LUA, 09 FEPUARI 2021

Na nofoia e le Fofoga Fetalai le Nofoa i le itula e 9:20 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga ma Galuega a le Fono Aoaofa Fautulafono.

Malo le soifua ua malo foi le tauatai, ia manuia le alofaiva.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2020/2021 – felafolafoga faaaauu i luga o le
faitauga faalua – Aso 15**

FOFOGA FETALAI: E tolopo Galuega a le Fono Aoaofa i le aso Fono ananafi ua maea ona saunoa le Afioga i le sui usufono mamalu mo le itumalo faaalaalafaga o Lotofaga.

Ia, o le avanoa leni mo le sui usufono mo le itumalo faaalaalafaga o Faasaleleaga Nu.4 e tulai mai e saunoa e tusa ai ma le tatou galuega.

Afioga PESETA VAIFOU TEVAGAENA (Faasaleleaga Nu.4): Ia, e faatalofa atu i le paia maua o leni taeao, i le afio o lau Afioga i le Fofoga Fetalai, afio foi lau Afioga i le Taitai o le Malo, lau Afioga i le Palemia ma le Kapeneta, afio foi sui usufono uma o leni Maota.

E faatalofa atu foi i le tapuaiga i Ofisa Sili o Pulega o Matagaluega ma Faalapotopotoga Tumaoti a lo tatou Malo.

E faatalofa atu foi i lo oulua sa seelua i aao tusitusi o le Maota, e faapea foi le mamalu o le Matagaluega o le Fono Aoaofa Fautulafono.

E avea foi leni avanoa e fia faaleoina ai se faafetai a lou nei sui usufono i le tapuaiga a si o tatou atunuu e amata mai lava i mauga tetele seia paia fanua a lalo, i le afio o lau Afioga o faaaoao i ai lo tatou Malo, le Afioga i Le Ao o le Malo ma le Masiofo, afio foi lau Afioga i le Sui o le Fono a Sui Tofia ma lou faletua. Afio lau Afioga i le Faamasino Sili, afio foi lau Afioga i le Peresetene, alii ma tamaitai Faamasino o le Matagaluega o Faamasinoga o Fanua ma Suafa.

E avea foi leni avanoa ou te faatalofa atu ai i le tapuaiga a auuna totofi a le Atua o lo o faafalelemalu i itu e fia o Samoa, aua lo latou foi tiute i lo

latou valaauina, tatalo i le ao ma le po ma aso uma aua le manuia o Samoa ma ona tagata.

Ia, e avea foi lenei avanoa ou te faatalofa atu ai i si ou itumalo pele, si ou itumalo i Faasaleleaga Nu.4, ia, le paia ia te oe Sa Tuala, le paia o le Faalagilagi o oe na masaesae ai le lagi. Le tatou itumalo, ia tapuai maia se i taumafai la outou auauna e faaleo foi se sao o le tatou itumalo, aua ua outou masani foi, faafogafoga ma matau mai le sui usufono sa outou filifilia. Ia atonu o le aoga foi lenei o le avanoa matagofie ua aumai e le Atua i lenei taeao o le a taumafai atu ai se sao o la outou sui usufono.

Lau Afioga i le Fofoga Fetalai, e fia momoli se faamaisega a lenei itumalo ona ua faia le pou o lenei Maota i le valaau paia a le Atua i le Afioga i le sui usufono ia Vaafusuaga Poutoa. O le tama, o le uso, o le tuagane. O se mafutaga ua motusia, ona o le valaau paia a le Atua. E manatu ai lou sui usufono, ona o le tina po o le faletua, o suli ma feoi o lenei itumalo. O le ala lea e manatu ai lenei itumalo, ia e lototele, ioe, ia e lototele, o le iuga lava lea o le soifuaga lenei tatou te i ai, ioe. O le matou tatalo, ia e mafuta pea i le Atua. O lea ua lagia Sa Tuala, Lefaga ma Faleaseela, ona o le valaau lava a lo tatou Matai Sili. O le tatalo a lenei itumalo, Vaafusuaga, ia manuia lau faigamalaga uso, e tatalo i le Atua ia maua sou nofoaga mau i le ola e faavavau.

E avea foi lenei avanoa e fia molimoli atu ai se faafetai a lou nei sui usufono i lau Afioga i le Fofoga Fetalai, paga lea se mafutaga a faigata, aemaise matou e fou mai i lenei Maota, i le matou faalogologo mai tua ae matou te le i oo mai iinei, ua moni ai le muagagana, “Ua muliga mea na matou faalogo i ai i mea ua matou vaai i ai.”

Lau Afioga i le Fofoga Fetalai, i le matau a lou sui usufono, e eseese lava Fofoga Fetalai ua ou faalogologo i ai, talu ona ou oo mai i le Maota lenei, i le taua, ioe, o lenei tofiga faa-Fofoga Fetalai, o se tofiga e le faigofie, o le tofiga e tuu i luma o le Atua. Peitai o lea ua faafogafoga le Maota ma faafogafoga foi le atunuu, ia ua sauni lau Afioga i se faiga malologa. Tulou le suafa Leaupepe, e tele mea taua ua ou maua mai, atonu o nisi foi ia o finagalo o sui usufono, maua mai i le faatinoina o ou foi tiute faa-Fofoga Fetalai, e te faatoatoa filemuina, e te faagalogalo. Ioe. Po o le a lava le sousou ma le lukaluka o le Maota lenei, faafetai Leaupepe, e toa lava le tai. Aisea? O lena e ia te oe le tofa. Ua matau foi e lou nei sui usufono, faafogafoga foi le Maota i le tele o taimi, e saunoa lava i le mea lea, a o lea saunoaga o lo o i ai se feau ia i matou o sui usufono. Ua taoto Tulafono Tumau, a o le vatapuia ma le vanonofo, e pei o le agaga lea o lea matou te matau atu, tasi lea aoaoga sili i lou foi sui usufono, o se toamalie, ioe, ma le filemu e faatonu folau ai le tatou Fonotaga. E oo foi i taimi o tatou mafutaga a tatou foi faalotoifale faale-HRPP, e matau lava e lou lava sui usufono le tulaga lea, e pei a saunoa le Taitai i se mataupu faa-Vaega Faaupufai, ia o lau Afioga lava e talifuitau. E le umi lava ae pei e maligi loa loimata o lau Afioga, ua uma

foi se mataupu. Ia o loimata ia e taua ia te au, o loimata o le filemu, ioe. O loimata ia o le filemu.

Ia, Leaupepe, e faapea atu se matou faamatalaga, matou te tatalo i le Atua i lau faiga malologa, ia foai e le Atua ni aso e tele o lou soifua, e tele tiute ma faiva o lo o faamoemoe le Atua e faatino ai lo tatou ola galulue mo le Atua. Ia faamanuia le Atua i lau Afioga. Ia faamanuia tele le Atua i le faletua ma le nofo a alo, faapea le tapuaiga a le itumalo. Ia, e pei o se matou faafetai lea i lau Afioga.

Ona manatu lea o lenei sui usufono, o lea ua matau atu o nisi foi o lenei Maota o le a sauni foi e fai malologa. Ia o lea e le o afio mai le Tama matua le Afioga ia Aeau, e faapea foi le Afioga i le Minisita mo Tina ma Tamaitai...

FOFOGA FETALAI: Malie lava le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, ou te le fia faalavelave i le saunoaga a le Minisita Lagolago. E pau lava le tulaga lea ua ou tulai atu ai, o lea ua lata i le 20 minute talu ona amata le tatou Fono, ma o le tatou Tulafono Tumau e le tatau ona i lalo... e tatau ona i luga atu o le 26 le aofai o sui usufono ona amata lea o le tatou Fono. O se mea e fia malamalama ai. O le Tulafono Tumau e 50 le aofai o le Palemene, e le tatau ona faia se Fono e le i sili atu ma le afa. O lea la ou te matau atu, ou te faafetai i le aofai lea e tulai mai nei e 33, lona uiga e toafitu sui usufono ia ua silia ai le tatou fuainumera. E le faigofie le tatou tautoga o le faamaoni, na tatou omai e soalaupule ma faasoa le manuia mo le tatou atunuu e ala i tonufai ma seleni o lo o mafai ona maua. O lea la ua fai si umi o tatou feiloai, ae taua tele ia te au o le Taitai le nonofo mai o le Itu Agai o lenei Vaega e agaia le Vaega, ia, ae faapea foi la ma latou o lo o fofou mai e tetee mai i le Malo, a o lea ou te vaavaai atu e le o nonofo mai i o latou nofoa, e tapuai saunoaga a sui usufono o lo o sausaunoa, ia ma ni mataupu foi e fia laga. O le faamaoni i mea iti o le tali foi lena o le faamaoni i mea tetele.

O lea la ua ou faafesili atu i lau Afioga, po o aumai ni faanoi a i latou nei, aemaise lava le Itu o lo o tetee mai i le Malo ma o foi fai a latou faasalalauga e tetee mai ai, aemaise o ni faasalalauga e le faamaonia. A o lea la e tausolomua ia i latou nei o lo o faaigoa o le Faatuatua e Tasi Samoa, le Vaega lea o le Faatuatua i le Atua Samoa ua Tasi, lea e le o alaala mai i i. Ua ou faalogo ua tuu le Fono ae o e fai a latou faatosina i Savaii, a o lea e le i maea le Fono a le Palemene. O le ala foi lea e tuuavana ai se i aumai mataupu e tusa lava po o le tatou toe Fono lenei, ae e faataua mo a tatou faamaumauga, ae le gata foi i lea, o le taua mo le faafogafoga mai a Samoa, o i lea e faamasino ai tatou e tusa ai ma le tatou tautua ma le faamaoni ma le

faatinoina o tatou galuega. E leai lava se mea e ese ai le mea lea ma le tagata faigaluega e le faamaoni, e amata i le 8 ae alu i le fale e le i taina le 1 ae o la e totogi. O la e totogi. O le gaioi le mea lena, o le talia o le totogi ae o lea e le o faigaluega.

Lau Afioga i le Fofoga Fetalai, o le tulaga lena o lea ou te faafesili atu ai i lau Afioga, po ua aumai ni faanoi a i latou ia ou te vaai atu ua le omai ua faamuamua a latou mataupu, a ua tia i le Fono a le atunuu. O la e fia faafogafoga mai o latou itumalo pe i ai foi ni mea e tuualalo mai ai i le Malo, o le avanoa lea.

Lau Afioga o le faafesili atu lena.

FOFOGA FETALAI: Malo faafetai. Ia, ua manino le fesiligia o le Nofoa e le Afioga i le Taitai o le Maota, aemaise foi o le Taitai o le Malo. Sa ou talitali laitiiti faapea e tali taunuu mai sui usufono mamalu, e pei lava foi ona silafia e le paia o lenei Palemene, e tele lava ina tuai mai sui usufono mamalu i le tatou Fonotaga, aemaise lava o sui usufono ia e pei ona taua. Peitai, o lea na ou tapa nei le faamaumauga ma se lipoti mai a le Failautusi o le Fono ina ia tuuina mai mo lou iloa, aua ua faapena ona tuuina mai e le tele o sui usufono a latou faanoi e auala mai i le Failautusi o le Fono ona faatoa faaooina mai lea ia te au. Ia, e tonu ma sao le saunoaga, o lo o faanoi mai le Afioga i le Tama matua le Afioga ia Faasootauloa Pati o lo o gasegase e le o lava le malosia, o le Tofa a Lio Foleni o lo o feagai ma le fonotaga a le Komiti o Tupe a le Ekalesia EFKS o lo o aafia ai, ua faanoi mai. Oo mai foi le faanoi a Faumuina Wayne Fong o lo o tuatuagia i tulaga le maalofia. O Nonu Lose o lo o gasegase. O Aumua Isaia Lameko o lo o tuatuagia faaleaiga, e le o po se lilo o ia e ana le tuafafine o lo o faapena ona tausialii i le Afioga ia Vaafusuaga Toleafoa Ken. Ia, o le Tofa Olo Fiti Afoa, o lo o faanoi mai o lo o gasegase. Ia, ma le Afioga ia Laauli Polataivao, ia o lo o tuatuagia faale-Vaega Faaupufai. E pei o le tulaga lena o lea e faanoi mai ai Laauli, o tuatuagia faale-Vaega Faaupufai.

Ia, e pei na pau lea o latou ua tuuina mai faanoi, ua ou manatu e tolaulau i luma o le Palemene, ui o se mea fou lenei mea, ae manatu e lelei lava ona... leaga o lea foi sa fesiligia ananafi e se tasi o sui usufono le tulaga o le maopoopoga o Vaega Faaupufai, a o le maopoopoga e afua mai pei ona saunoa le Afioga i le Taitai o le Malo i le tausisia o a tatou tautoga o le loto faamaoni ina ia auai i Fono a le Palemene. A tauaofia loa Fono a le Palemene, e taoto uma tuatuagia, e oo lava i a tatou Faamasinoga, mo le silafia e le Maota lenei. So o se mea lava e tolo, e tolo pe a Fono le Palemene. Ia, o le tulaga lena mo le silafia, aemaise foi o le faafogafoga mai a le atunuu. E tolopo uma lava galuega, mea uma, e oo lava i le Faamasinoga. Po o le a le Faamasinoga matuia e molia ai le sui usufono, ae afai e Fono le Palemene, e tolo le Faamasinoga i le tulaga o le Fonotaga a le Palemene. Ia, o le faamanatu atu lea, a o lena ua silafia ma faafogafoga le Palemene, aemaise foi

o le faafofoga mai o itumalo e faasino i ai sui usufono ua ou tolaulauina o latou suafa, ua faaooina mai a latou faanoi i le Failautusi.

Ia, o le tali atu lea ma le agaga faaaloalo e ui lava ina lagona foi le faanoanoa o le Fofoga Fetalai ona o le lē maopoopo o a tatou Fonotaga, ia, ae o le a ea le tatou mea a mafai, e fai foi o le tauto ae pule lava le tama a le loomatua ia, tulou, se i vaeatu la paia o le Fono i le tulaga o le faatinoga o ona tiute. Ae o i ina e silafia ai e le itumalo le sui usufono o lo o faapena ona toaga mai ma faamaopoopo i a tatou Fonotaga.

Ia, o le matou tali atu lea ma le agaga faaaloalo i le fesiligia, leaga e tatau ona fesiligia e le Taitai o le Maota le tulaga o le maopoopoga o le tatou Palemene. Ia, o le tali atu lea ma le agaga faaaloalo.

Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoui: Lau Afioga i le Fofoga Fetalai, o le tulaga lena na ou tulai atu ai, a matau mai e lau Afioga, o lea ua faalogologo atu, o lea e i ai tuatuaia o se tasi o latou nei, a o tuatuaia faaupufai. O le Vaega Faaupufai foi lenei lea ua faataatia ese uma lava ana polokalame, a o lea ua faatino le tautoga na ala ai ona oo mai i totonu o le Maota lenei. I le taimi nei, lale e toatele tagata o lo o fia vaai i Minisita i a latou foi mataupu, le paia o le tatou atunuu. O au foi ia, o le matua tele o tagata o lo o fia vaai ia te au, o la e ua tuu atu uma i le aoauli, ona o le tatou Fonotaga. Ae silasila mai lau Afioga i le Kapeneta, o lea e atoa uma le Kapeneta, o le Afioga i le alii fomai ia Tuitama lea e agai atu i tua, o lea e atoa uma le Aiga Kapeneta, leaga o le anava lea a le Vaega lenei. O le isi lea mea sa fesiligia ananafi e se tasi o lauga a le sui usufono ua leva ona i totonu o Faiga Vaega, a Fono le Vaega lenei lau Afioga i le Fofoga Fetalai, o le upu lea e fai, tautuana le tatou Fono ia atoa le numera, aua ne i lagonaina le logo o tauvalaau sui usufono e omai e tau faaatoa le numera o tatou Fonotaga. Sa tupu i aso la i Nofoaiga ia muamua atu i le HRPP. O nisi o latou, e tausolomua lava i Minisita ona le omai i Fonotaga a Faigamalo i na foi ona aso. Ae ua le toe tupu la i le taimi lenei, ona o le malosia lea faa-Vaega Faaupufai i a latou Tulafono, e tautuana ma latou e faataua o latou tofi. Ia o lea la ua silasila mai lau Afioga o lea e saofafai uma atu le Aiga Kapeneta, e faataua le take note o mataupu e laga mai, aua e le faapea e faatali manao o tagata i le tai fanae ma le taimi e alu pea i le vili o le vae sekone. E fai lava galuega e oo atu i le Ofisa o faatino. O lea foi e matau, e oo mai lava iinei i le Palemene nisi o le atunuu ona o le moomia vave o se faaiuga na o Minisita e mafai ona faatino faapea foi Ofisa Sili o Pulega.

O le tulaga la lena ou te tulai ai ma le ava tele lau Afioga, o le ala lena e maopoopo ai le Vaega lenei, leaga e malamalama lelei ma usitaia o tatou tiute na tatou omai ai, ma vaai i le expectation, le faamoemoe o tatou Taitai

e omai sui usufono o le HRPP e maopoopo, ona faitonu faatasi lea i totonu o le Palemene lenei.

Lau Afioga i le Fofoga Fetalai, o lea sa tau fesili po o a ni tulaga e tau uunaia ai se Faiga Vaega. O a tulaga e tau uunaia. Ae fesili le sui usufono aupito leva, ou te leva laitiiti atu lava. O lona uiga, o nei tausaga e tele sa faatasi ai, e leai se malamalama i auala e faamaopoopo ai mea o vaega. E le tau faamaopoopo i ni tupe. O le HRPP i le taimi na faatulai mai ai, e leai ni tupe, a o le maopoopo ia. O le proof lena. O le faamaoniga lena e le moomia ni tupe e tau faamaopoopo ai, a o le maopoopoga e auala mai i le galulue auautasi ina ia taunuu le manulauti. O le a le manulauti? O tatou e omai e fai tonu, tonufai mo le atunuu. O i ina e talitonuina ai mea nei o sui faatutu ma le Vaega e o atu ai. O mea faapenei e silasila mai, o lea e saofafai lelei ma fai tonu, fai tonu mo le manuia au i luma o le tatou atunuu. Ae iloagofie lava le tagata e le talitonuina, o le tagata e fealoalofai, e fealoalofai e faatino ona tiute faa-sui usufono. O le ala lena na ou tulai atu ai, leaga e mamafa tele ia te au le lafoga lea. E faapefea ona maopoopo vaega? E amata mai lava i le Taitai. A fai o le 45 lea e i ai nei o le Vaega lenei. Thats leadership o le 45 e galulue faatasi, mo le faamoemoe e tasi. O la e faamoemoe e tasi, ia manuia fuafuaga auiluma a le atunuu. O le tulaga la lena, e maopoopo ai, ae le tau faaoga ni seleni e tau faamaopoopo ai. O le taimi na fai ai le mea lea na saunoa mai ai le sui usufono ananafi, o le mea e oo i ai. O le afe Vaega Faaupufai e manao e tufatufa tupe ia, na ona uma lava taape. E pei foi o Aoga Faataitai, e ona alu atu lava o le mea ua uunai Aoga Faataitai, ia o lea ua fia selau le mau Aoga Faataitai, a o le tupe lea e tuliloa. O le mea lena o lea ua ou vaai atu, e manao e avatu ni tupe e avatu loa tufa, aua e na ona pau lava lea o le mea e manao ai, e na ona avatu lava tufa. Na ona uma a...na ona uma atu lava o le faiga palota, e le toe i ai ma ni Vaega Faaupufai.

Na ave le ½ eka i le talosaga mai a le vaega lea o le Tautua i le Nofoaiga lea talu ai ma maua a latou seleni i faasoaa le Malo. A o le a le mea na tupu? Na uma atu lava e leai se fale na fai, o la ua toe se i ese mai i le ½ eka na tuu atu e le Malo, e fai ai lo latou laumua, e fai ai so latou fale. A o lea ua omai lagalaga mai le a ma le a, e tataua ona toe tufa atu nisi tupe. O le tulaga lena lau Afioga i le Fofoga Fetalai, e le o tupe e maua ai le maopoopoga a o le faamaoni. O lou tulai atu lena e faafetai ai, ona o lea ua manino nei i le taeao nei le mea ua le o mai ai, o lo o fai a latou campaign, o lo o fai a latou faatosina.

FOFOGA FETALAI: Ia malo faafetai, e aoga foi le saunoaga a le Palemia, e faatonutonu folau ai i le lumanai, ma poupu ai tatou o taitai o le atunuu. Ina ia tatou tu i luma e faatino le upu. O le a le upu? O le tatou tautoga o le loto faamaoni. A o le aotelega o na mea lea na e saunoa i ai i le amataga o lau folasaga. O le lava e lelei ona pulea na i mea itu, e faapena foi ona ave i ai e le Atua ia mea e tele, ma e faapena ona pulea i le lumanai. E

leaga o upu ia o upu o le Tusi Paia na e saunoa ai. E ese lou faitau Tusi Paia lau Afioga i le Taitai o le Malo.

Ae tulai mai le sui usufono mo Faasaleleaga Nu 4, e pei e aoga foi ia oe, le saunoaga a le toeaina. Aua o oe le isi faiaga mai i le tatou Fono, ae saunoa ia faaauau le saunoaga.

Afioga PESETA VAIFOU TEVAGAENA: Ia faafetai i lau Afioga i le Fofoga Fetalai, o le a faaauau pea le lauga a lenei itumalo. Lau Afioga Faasootauloa, a fai o e faafogafoga mai, ia faamanuia le Atua ia te oe. Si ou uso ia Mulipola, lau fetalai Mulipola, e talitonu lava le agaga, sa manatu lava e faaauau pea lenei mafutaga, ae peitai o mea lava e tutupu. E le o mautinoa foi i nei mea ua sauni atu i ai, pe tatou te o uma lava i le vaa lena o le a e folau i ai, ae onosai. E faapena lava le soifuaga lea tatou te i ai.

Ona manatu lea lau Afioga i le Fofoga Fetalai, e fia patipatia le alofa ma le agalelei o lo tatou Matai i lenei taeao, aemaise le nofo tapuai mai o si o tatou atunuu. Ua taunuu manuia la tatou folauga, taunuu i manu ae le o mala. O le agaga lea e momoli ai le faafetai i le tapuaiga a si o tatou atunuu. O lea ua manuia o tatou faiva, nofo tapuai mai o tatou itumalo, faapea foi na i o tatou aiga, faapea foi le tapuaiga a Samoa ma tatou aiga i atunuu mamao. E ui lava o lea tou te faafogafoga mai, e le galo lava e Samoa ia outou o lo o papaaao i itu e fia o le lalolagi, ona o lou talitonuga o oe lava o le Samoa.

Lau Afioga e momoli le faafetai a lenei itumalo i lau Afioga i le Taitai lau Afioga i le Palemia. E faapea foi le aiga Kapeneta, sui usufono mamalu uma o lenei Maota, ona o le Maota lenei, o le fale lenei, o le agaga fialia lea i lou sui usufono. O le miti sa miti ai lo tatou Malo, o le a se aso o le a se taimi, tatou te nofoia ai se Maota matagofie faapenei. O lea ua tu le faila, ua tu le faila, o le Maota lenei, o le Maota e teu ai le tofa ma le faautautaga. O le Maota o ananafi, o le Maota o le aso, o le Maota o taeao. O fuafuaga uma lava a lo tatou Malo e fuafua atu iinei i le Maota lenei. E pei o le agaga lea e maualuga ai le faafetai a lou sui usufono, i le tofa a lo tatou Malo, ave lava le faamuamua i le Maota e lufilufi ai, o le Maota e faasoa ai o le Maota e manuia ai. Ae ou te le i sau i le Maota lenei, e faalogologo mai lava i fafo, o le tele foi o saunoaga matagofie a na i o tatou Taitai ua fai i lagi le latou folauga. Ua taoto mai i tiasa, sa taumate ae ona ua ou oo mai le Maota lenei, ua faatalitonuina lou nei sui usufono. E le faigofie le lufilufina o le tamaoaiga, fai atu fai mai, le la itu i lenei itu. E le faigofie, ae ua faigofie i le tofa ma le faautautaga. O le taimi ta te taunuu mai ai iinei i le Maota lenei, e lagona, e ese lou faalogoina, a e savali e te savali ma le fefe, a e tautala e te tautala ma le faaeteete, ona o le maota e mamala. E le o se maota o se aiga e le o se maota o se nuu po o se itumalo. O le Maota o le atunuu, o le maota o le atunuu. E momoli ai lau faafetai i lau Afioga i le Taitai o le Malo, ona ua manatu ane lava i le maota o le atunuu. E le o se maota o se Vaega

Faaupufai, e le o se maota o se HRPP, po o se maota o nisi o pati, o le maota o le atunuu.

Ina ua valaauina e le Atua ia Ieremia, e 3 lava vaega na filifilia ai e le Atua ia Ieremia. Na filifili e le Atua e avea ma Perofeta, toe filifili e le Atua e te pule i nuu, toe filifili e le Atua e te pule i malo. O vaega ia taua na filifili ai e le Atua ma ana tofiga na fai ia Ieremia. Fai mai le Atua ia Ieremia, “Ieremia aua ne i e fefe ia te i latou, ou te ia te oe, ou te laveai foi ia te oe.” Ona toe sau ai lea o le vaega mulimuli o le feagaiga, fai mai, “Ou te tofia oe i le aso e te pule i nuu, e te pule i le Malo, o le a e suatia, o le a e liaina, o le a e lepetia, o le a e soloia, e te faatuina, e te totoina.” O vaega uma nei o le feagaiga na faaauegaina ai e le Atua ia Ieremia e faatino ai ona tiute faataitai. A lea ua tatou vaai nei, o lea ua tatou vaai nei i lo tatou taimi. E momoli ai lau faafetai i le Taitai o le Malo, e le fefe lau Afioga, o lea ua tatou vaai i le moni, le moni, le moni o folafolaga na faia e le Atua ia Ieremia. Aua o le mea moni lava o lea ua fai atu le Atua ia Ieremia, aua e te fefe, ou te ia te oe, ou te laveai foi ia te oe. O le mea lea lau Afioga i le Fofoga Fetalai, o le ala foi lea ua ou le fefe ai foi. O la ou te soo i le Afioga i le Palemia.

FOFOGA FETALAI: Ia tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, e leai o le fesili ou te fia malamalama, i le sui usufono o lo o saunoa nei, aua o lea e talanoa ia Ieremia. Pe na faapefea ona oti ia Ieremia? Ma lou faaaloalo.

FOFOGA FETALAI: E manaia le fesili, ae se i fautuaina le sui usufono mamalu o saunoa, se i oo ia i le tatou Tala o le Tupe.

Afioga PESETA VAIFOU TEVAGAENA: Lau Afioga e toe pau lava lea o le toe taimi e faalogologo mai ai si ou itumalo. E le iloa foi pe e te toe silasila mai ia te au pe leai, ona o le Maota leni e mafua ai le feagaiga lea a le Atua. Ae se i ou tali muamua lava i le mea lea e saunoa i ai le... E te silafia foi lau Afioga o le Atua na te aumaia, o le Atua foi na te avea. O le tali lena lau Afioga.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, o lea na saunoa le Afioga i le sui usufono mamalu po o le sui faaaauu, o le tasi o fetalaiga a le Atua ia Ieremia, ou te puipui ia te oe. O le mea lena na ala ai ona ou fesili. Pe na faapefea ona oti Ieremia?

FOFOGA FETALAI: E i ai lava le manatu e...

Afioga PESETA VAIFOU TEVAGAENA: Lau Afioga, ua e silasila mai i le Tusi Paia lea ou te nofo ma au. O le faalavelave leaga e ese ma tapuaiga ma... E tele lava i le faa-Ala le tapuaiga, ae na o le pau lea o le tapuaiga o lea ou te vaai atu e pei tumutumu i ai, o lau tapuaiga. Leaga ou te fealuai lava ma ave le Tusi Paia lea. O upu foi ia ou te tautala atu ai, e le o ni au upu. O upu a le Atua, o le mea lea, o se e faalavelave i upu ia, talofa e, o le iuga lava o le palota. Ua maea foi sia vaega e aoga foi se i tou faafogafoga mai ai foi, o mataupu silisili. E le na o le tapenapena foi i tofiga faale-Malo ae tatou te tapenapena foi i le taimi e valaau mai ai le Atua, a o lea foi tatou te sauniuni.

Lau Afioga i le Fofoga Fetalai, ou te faafetai i fuafuaga alualu mamao a lo tatou Malo. E momoli ai le faafetai a lenei itumalo e faapena se faigamalo lelei, ioe faigamalo lelei. E pei lava o upu ia na fetalai ai le Atua ia Ieremia, e te faatuina, e te totoina. A lea ua tatou vaai i mea ua toto e le tatou faigamalo, o a outou talosaga na tuuina mai i le Maota lenei e ala ia outou aualagalua, a lea tatou... ua fua mai. O lea ua fua mai, faatino e le Malo aualagalua, o lea ua tatou vaai, e leai se mea. E te oso atu i i o maketi a na i tagata, o meaai, e le o fia aai le atunuu. O le mea moni lau Afioga i le Fofoga Fetalai, ua meaai loaloa uma pito uma. Aisea? Ona o le manuia ma mea na toto atu iinei i le Maota lenei, o lea ua faatino e le Malo lana pitolaau e ala i aualagalua, ia outou talosaga. Ioe, ua faigofie ai e na i tagata o tatou nuu ma afioaga e faatino le galueaina o le vao. O le ala lea ua tatou vaai i se fua mai. E faapena se faigamalo lelei, o se faigamalo e vaavaai mamao, o mea e toto atu iinei, e toto nei ae fua taeao.

O lea na malele le Afioga i le Taitai i le vaiaso lea na tea nei, i nisi o fuafuaga o le a faataatitia. Mo le tanuina i luga o auala i totonu o le taulaga. O ia fuafuaga o ni fuafuaga talafeagai, o fuafuaga alualu mamao a le Malo, o lea ua tatou vaavaai i ai i tulaga lelei. O fuafuaga lenei mo le lumanai, ona o lea ua feagai ma le lalolagi ma le atunuu lenei i suiga o le tau. Ua tatou vaai ai i lologa, o timuga ua oo foi i mafuie, ua tulaga ese le tau ua i ai. O i i le nofoaga lea i Taufusi, e tasi lea nofoaga e afaina tele i taimi o lologa ma timuga, aemaise foi o le vai pe a pa mai. E faapea foi i i i Fugalei, ua maualuga tele le water table lea e taoto ai i i, ua fai lava si maualuga o le vai. O le mea moni lava e pei e toe futu lava le alu i lalo o lau eli, ae tau i le vai.

O le tulaga lea o lea ua ou faalogologo atu ai i fuafuaga a lo tatou Malo, faafetai, faamalo i lo tatou Malo i ia fuafuaga lelei. E tasi lea vaega ta te mitamita ai i le faimalaga mai o tagata mai fafo, aemaise foi o le matau mai a tagata o le tatou atunuu o lo o aumau i la atunuu. O le tatou taulaga po o le tatou laumua. O se vaai lea e pei e tau atu ai i tagata mai fafo, se sologa lelei o i ai le tamaoiga i lea atunuu ma lea atunuu. A tatou o foi i la atunuu, tatou ilogofie lava laumua o ia atunuu, i le tetele o fale e fau agai i luga, e fau agai i luga. O i ina ta te vaai ai i le tele o suiga o lo o i ai, o lo o tau mai

ai i ina le alualu i luma o le tamaoaiga o se atunuu, o lona taulaga, o lona taulaga.

O lea foi ua tatou vaavaai i le auala laupapa tele lea i Vaisigano, lea galuega matagofie, i le matau mai a tagata matamata mai i upega tafailagi i atunuu mamao ma lenei atunuu. E momoli ai le faafetai a lou nei sui usufono i galuega a lo tatou Malo. O galuega vaaia nei e molimau mai ai le toatele o tagata, i le mea o lo o alu i ai le tupe a lo tatou Malo. E le gata i le tele o le tupe a le Malo e alu ia tatou talosaga, le manaomiaga a o tatou itumalo, aualagalua, o faleaoga, o taligalu. E pei e tasi lea mea, e pei a aumai le tala o le tupe ua pau, ia na o le tagata lava e faitio na te le malamalama i le mea e pau ai se tala o se tupe. Ona o le tele o le tupe ua faaalu e le Malo, o lea ua faaalu e le Malo e faatino ai a tatou atinae, e faapena le tamaoaiga o se Malo. A oo foi ina fua mai, e i ai le taimi e vaai ai ua toe alu ai i luga le tatou tamaoaiga, ua alu foi i luga le tala o le tupe.

Lau Afioga i le Fofoga Fetalai, e matauina lava e lou sui usufono, le tele foi o nai galuega na afaina, afaina i lologa ona o suiga lava o le tau. E pei o auala laupapa, ioe, le auala lea i Moamoa aemaise foi le auala i si ou nuu i Lano. O la e faafogafoga mai si ou itumalo. O le agaga faafetai i si ou nuu i Lano, ona e tasi lenei auala ua leva, ona ou talosagaina i le Paeaiga talu ai, ae ou te faafetai i lo tatou Malo o lea ua tali mai. Lo tatou nuu, e tasi lenei aoga o le sui usufono, sa outou filifilia. Te i ua outou faapea e fealualuai i inei i le taulaga le sui usufono, ae leai. O lea lava tou te vaai mai, o lea e faatino lava, o lea e faatino lava.

O le mea lea e tatalo atu ai i lau Afioga i le Minisita o Galuega, e pei e manaia ae ooti ia le lipine e eli ai, o le a amata le ground breaking o lenei galuega e le i faia le palota. Se i faatalitonu ai lou pitonuu lea, e le o nofonofoai le sui usufono, o lenei lava e tuitui, tuitui, tuitui lo tatou Malo. A fai la o faafogafoga mai lo tatou nuu, momoli lea o le faafetai i lo tatou Malo, ua malele le Taitai o le a avatu le faamuamua i le tatou nuu. Ona o lenei auala, o le auala na toatele ai i latou na fano ai le soifua, toatele o e na maliliu. E pei foi o le faalavelave na tulai mai i le pasi, mafua mai lava i le vaitafe lea. E faapena foi mea na tulai mai i le Maliolio, ua o tatou vaavaai, tatou vaavaai. O le Maota lenei lau Afioga, ou te faaigoaina lava e au o le faatoaga leaga o i inei e toto ai, o i inei foi e selesele ai. Ua leva ona toto le talosaga i le auala laupapa o le Maliolio, o lea ua tatou vaavaai i le matagofie o lenei galuega.

E momoli ai le faafetai a lou nei sui usufono, i le tele o soifua ma le ola, e le gata i si ou nuu o la e faalogologo mai, a o le atunuu. Ua maumau lo latou soifua ona o tulaga lava o mala lava faale-natura ona o le suavai. Aemaise lava ona o le suiga o le tau ua i ai nei, e le o se tatou loto, o a lava foi atinae ma galuega a le tatou Malo e fuafua, ae pule lava le Atua. E pule lava le Atua o Ia na faia, so o se mea foi la tatou te taumafai e faatino, ae tatou te faamoemoe i le Atua mea uma, o le agaga lenei e momoli ai le faafetai.

O le isi auala lau Afioga i le Minisita o Galuega, se i silasila ifo lava i le auala laupapa lea sa ou lauga ai foi. Ua matagofie le auala, o le auala e matua lelei lava, e masalo o lea e molimau uma lava matou nei mai Savaii. O le auala laupapa lea, ua faalua ona tafefea fale, faletalimalo, o le auala lea i le tuaoi o Lano ma Asaga, ioe, ua faalua ona tafefea. E mafua mai, ona o le vaitafe lea o le Maliolio e faalava ifo i uta, o siga uma lava ia o le vai ma matavai ia, e pei a pa mai le vaitele lea, e aafia, o Lano, o Sapapalii.

O lea foi na saunoa se tasi o sui usufono, le tofa ia Tofa, e sao lelei. E faalua foi ona tupu le mea lea i si afioaga lea, a o le vai lava lea, o le faafitauli lava o le vai lava lea. A o le mea la e tupu i le auala laupapa, o la e lelei atoatoa. A silasila i le itu i uta lau Afioga i le Minisita, ua fau i luga le oneone paepae, ona o le mea lea e tupu, ia o le ata lava, o ai lava inisinia na design ina le fauga o lenei auala. E i ai le bim sima la e i lalo, e maualuga, e sau mai le isi pito i le isi pito o le auala laupapa.

O le faafitauli la lea e tupu, aua e tu tonu lava i luga e lata i le matafaga. A sau la le sami pe a pe le tai, ona alu lea i uta, ae a foi mai le suavai ona nofo lea o le oneone ae foi na o le suavai i tai. O le mea la lea ua tupu, ua faaputu faaputu faaputu ua fetau la tafeaga tetele nei, ua faigofie ai i le vai ona oso i luga. O le faalavelave la, e pei lava ona ou fai atu, ua faalua ona tafea le resort lenei i totonu o si ou nuu. E pau lava lea o lau tatalo lau Afioga i le Minisita, se i toe silasila ane lava lau Afioga, po o le a se togafiti, o le a foi se auala e faafoia ai. A o le auala o la e lelei atoatoa, lelei atoatoa, e leai lava ma se mea o faaletonu o le auala laupapa.

O le tatalo a lou nei sui usufono, se i toe silasila ane lava lau Afioga i le tulaga lea. Na saunoa le tatou Taitai, i le malaga lea na taamilo ai i le motu tele i Salafai, o lea e molimauina ai e le Palemia ma le aumalaga, le matagofie o le auala taavale lea e taamilo atu i Salelologa i le motu i Savaii. Aemaise lava le auala lea e alu atu i si o matou nuu i Puapua e tau i o i Samalaeulu. O le auala lea lau Afioga i le Fofoga Fetalai, e ese le matagofie e oo lava i auala atoa i Savaii. E masalo o le auala lea po o se taimi o le 1980 na fau ai. A ou fua atu i ai o se mea ua 40 tausaga, e le i faapea lava ua i ai lava se mea ua pu, pe ua toe reseal, o lea ou te fai atu e ese le manaia o fausaga i na taimi. A o lea ou te mautinoa lau Afioga i le Minisita, ona o le amataga lena o auala, sa i ai lo tatou Malo, sa i ai le code foi lea e tau o le primer. O le primer la a malo e pei o le sima ia lalo le footing lea o le auala. Ae ai ona o le taimi nei o lea ua sui ua le toe faaogaina.

A matau la i suiga o le tau lea ua i ai nei, o le mea moni lava e le umi lava ona timu pe afa itula, ae tilotilo atu i le mafiafia o le vai, pe ua 3 i le 4 inisi le mafiafia o le suavai. E pei o le tele lea o le faafitauli, ona o le suiga o le tau. O se tatalo atu lava i lau Afioga, se i toe silasila ane lava i le tulaga lea lau Afioga. O lau foi matau i le tele o atinae lelei ua uma ona faatino. Atonu foi ua tele lava ina saunoa i ai nisi o sui usufono, o le agaga lena o le fiafia ma le agaga o le faafetai.

E masani ona ou molimoli atu sou manatu i le tele o Fonotaga, i le tulaga lea lau Afioga i le Minisita o Galuega, se i toe silasila ane lava, ona o lea ua tatou matauina pea, matauina pea ia le tulaga lea ua i ai le tau. I le toe faatinoina o tatou galuega tetele i le fausiaina o fale, aemaise lava auala laupapa. Ona e tasi lea mataupu e masani lava ona ou lotea, ou talanoa atu ai. Ona o lau matau i le tele o galuega tetele nei, o le matagofie ia o lona faatinoina. Ae ou te talosaga atu lava i lau Afioga, se i toe silasila ane lava. Ona o le tele o galuega tetele e tataua ona aumai ni masini faapitoa, e test uma ai pou o fale tetele nei ma iviivi o fale tetele nei.

Ou te manatua le ma malaga ma le Afioga ia Faumuina Liuga a o avea Faumuina ma Minisita o Tupe, masalo po o le 2012 na ma malaga ai, malaga la i le fono i le Malo o Initia. Ou te le iloa po o manatua e Faumui. Ma te taunuu atu la, o lo o faasalalau ai i le taimi lena se tasi o fale suisui tele lava o le Malo lea ua solo uma i lalo. Tusa e le solo le fale, ae solo lava na o le floor o le fale. Masalo pe ova atu ma le 100+ i latou na maliliu ai lava i le taimi lena, ona o le mamafa o i latou e galulue ai, faatasi ai ma le mamafa o taaiga ie tetele nei. Aua o le tasi lena kamupani e tele ina latou auina atu latou oloa o mea tau lavalava i le tele o atunuu. O lona uiga, e le laititi, o le tele o taaiga ie, o laau suisui, o le mamafa e tauave e floor nei, ua le talafeagai le mamafa o floor na fausia ai ia galuega ma le mamafa o le faatinoga o galuega nei.

O le ala lea lau Afioga i le Minisita e tatalo atu ai i lau Afioga. O masini ia lea ou te talanoa atu ai, e tutusa lelei lava ma masini ia e siaki ai manava o tina, tina ua maua i le maitaga, ioe. E faapena uma lava le faatinoina o le masini lea lau Afioga i le Fofoga Fetalai, ioe. E alu atu lava la le tagata foi lena i ai le poto faapitoa. O se faataitaiga; o se pou uamea tele o le fale tele lena, a o lea o le a uelo mai i ai se beam tele lena ina ia lokaina ai le fale lena. O nei galuega, ua i ai le malosi, le malosi e ueloina ai pou nei ma beam nei, e oo i iviivi o le fale. Aua e ui lava i vaega uma lava o se fale, e tasi lava le vaega e ave i ai le faataua, o le structure, structure. O le auivi, o le auivi o se galuega, o pou iviivi, aua o latou nei o lea e amoa uma le mamafa o nei galuega.

O le uiga o sau faamatalaga lau Afioga, afai la o lea ua uelo nei iviivi nei po o pou nei, o totonu o nei ata o lo o i ai i totonu o latou details o ata nei le malosi o matagi e fetai ai ma le malosi e tauave ai le weight lena. Afai o le iviivi o le fale...

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai...

FOFOGA FETALAI: Ia, se i tulai mai le sui usufono mo Falealili Sasae, le Afioga ia Fuimaono.

Afioga Fuimaono Teo Samuelu Teo: O se mea e fia malamalama i le saunoaga a le sui usufono. O lea e tau fetuunai lou mafaufau, pe faapefea e le masini lea e siaki ai maitaga o tina, se i tulou, ona faatusa i le masini la lea e siaki ai pou. Aua o au nei, e leai lava se siaki a si ou toalua ou te le alu ai, ua ou vaai foi i le faatinoga, aua e toa-iva si au fanau. O lea la e tau faatusatusa e lou mafaufau, pe faapei e le vaega ona faatino le vaega lea aua e le na ma le laina foi le tulaga e faatino, e i ai le vaega foi lele e tuu muamua i le manava ona faafealuai ai lea o le mea lena, foi lele e te iloa atu ai le tagata lea e i totonu, se i tulou. Pe faapei i la le faiga, pe siaki pei o le siaki lea na siaki ai e le Minisita o Aoga fafine foi nei e tuutuu i ai le taliga, pe o le a le ituaiga faiga e fai i ai. Ia, aua leaga o lea ua talanoa i le masini lea e le o malamala i ai, po o sana ia lava theory o la e mafaufau i ai, ae o se mea e le tupu. Ia ma le agaga faaaloalo.

FOFOGA FETALAI: Malo. Ia se i... se aua e te pepeloa le Palemene. Ioe. Ma o lea ua atoa lou taimi faatulafonoina...

Afioga PESETA VAIFOU TEVAGAENA: Se i ou tali atu lava lau Afioga i le Fofoga Fetalai, leaga o la e faalogologo Samoa, o la e faalogologo lou itumalo. O ai lava se sui usufono e talanoa i le Maota lenei, talanoa i mea sao, talanoa i le amiotonu, leaga o la e faalogologo mai le itumalo. A o lea se i ou tali atu i le mea lea e... E taua foi, e lelei foi le tou omai i le Maota lenei e tou te faalogologo ma maua ai nai nisi lesona e nai isi sui usufono e avatu ai le tomai i nai isi sui usufono.

O le masini lea lau Afioga, e tau o le UT Machine faafofoga mai, e tutusa ma le Ultra Machine lea e siaki ai manava o tina. O le masini lea, e alu atu la faapea o lea ua uma ona uelo le sooga o le uamea, sooga o se mea ua uma ona uelo, ona alu atu loa lea o le tagata faapitoa lenei, pei uma lava o le tele o le laptop, le masini lea, pei uma lava o le tele o le laptop.

FOFOGA FETALAI: Le masini a Tuifaasisina?

Afioga PESETA VAIFOU TEVAGAENA: Lea, ua silasila mai lau Afioga, o le tele lea.

FOFOGA FETALAI: Ia aua o lena e te tusi ia Tuifaasisina Misa.

Afioga PESETA VAIFOU TEVAGAENA: E faapena la pei o le tele o le laptop, e tu la i luga o le beam, e tu lava i luga o le uamea. Ona alu atu loa lea o le tagata lenei, e i ai foi la le gel, pei lava o le gel lea e faaoga i le manava o tina. Ioe. E tutusa lelei lava le faatinoga o mea ia. O le ala lena e ala ai ona ou fai atu, e tutusa lelei le faatinoga, e faasusu le uelo i le gel, e oloolo foi le uelo i le mea foi lea pei o le mea lea e te talanoa mai ai e oloolo

ai le manava o le tina, ona e tilotilo loa lea i luga o le screen, ona e tilotilo lea i luga o le screen, i totonu o le ata lea o le detail lea ua aumai...

Afioga Hon Gatoloaifaana Amataga Alesana Gidlow (Faasaleleaga Nu.1 Sisifo): Lau Afioga i le Fofoga Fetalai...

FOFOGA FETALAI: Ia, se i tulai mai le Afioga ia Gatoloaifaana. Ia, tulai mai lau Afioga Gatoaifaana.

Afioga Hon Gatoloaifaana Amataga Alesana Gidlow: I lou ava lava ma lou faaaloalo, e nofonofo atu lava e matamuli. Ae a pe a se i see ese le sui usufono i se isi faataitaiga ae tuu ia matou tina ma le matou matafaioi e matou te tautatala matou i ai matou te iloaina. Ia, faafetai lava mo le avanoa.

FOFOGA FETALAI: Ae a pe a malie le sui usufono, se pei e sao le faauilavea. See ese maia i lea mea o la e lulu le ao o Salausa le la aua o Salausa o le fomai.

Afioga PESETA VAIFOU TEVAGAENA: Ioe. Lau Afioga, leaga o lea ua fesiligia e le sui usufono mo Falealili le mea lea, ae na pau lava lea o le masini e faatusatusa i le mea lea ou te talanoa atu ai. E le mafai la ona ou talanoa ese i le mataupu leaga o la e ua fia malamalama le sui usufono mo Falealili.

O le masini lea, e tuu atu loa le gel lea i luga, ona e tilotilo lea i luga i le screen o le laptop, tagata ia o lea e siakia galuega tetele, e vaai lava la i le ata o le fale lea e faapea, e fia, pe 200, 300 le malosi o le matagi e faafetaiai, faafetaiai ma iviivi nei po o pou nei. E tau mai foi la i luga o le screen, ua au le malosi o le uelo lea i le mea lea. Aua foi e te vaai atu lava i le pupple lea e pei lava... o le ala lena e ala ai ona ou fai atu, e tutusa lelei, o le gel, e tutusa lelei. Ia o le mea lena o lea e faamalamalama ai le tulaga lea.

FOFOGA FETALAI: Malo. Ae a pe a faauma i tua i le tatou... pe a fai le tatou malologa le faamalamalama ia Fuimaono, ae see atu le saunoaga e faaauau le tatou Fonotaga.

Afioga PESETA VAIFOU TEVAGAENA: Lau Afioga, o le mataupu lenei o se mataupu taua tele ona o le tele o faalavelave tutupu. E le o se mataupu... o le mataupu e sili ona taua, ona o lea e pei foi ona saunoa le Taitai o le Malo, ona o suiga o le tau, ina ia faamalosi le tele o galuega. E faapefea ona faamalosi? E faapefea ona e iloa se galuega ua malosi ma lelei atoatoa? Na pau lava lea o le masini e tau mai ai ua lelei atoatoa se galuega. O le taimi lenei, pei o lea tatou te vaai e le mafai ona ati lau vaai i se uelo. Na pau lava lea o le masini e te iloa ai mea ia e faaletonu i le ueloga o uamea nei, ioe. E te iloa ai i totonu o le screen o le masini lea mea e tau o undercuts.

O undercut e mafua mai i le mea o le vai lea e i totonu, ioe. Ua alu atu lava le tagata lea e ueloina alu atu lava uelo sao, ae tatau ona pre-heated le uamea, tulou lava, e tatau ona tunu le uamea ina ia vevela, faatea ese vai la e i totonu. E ala la ona ta'e le uelo, ona e mafua mai i tulaga ia lau Afioga. O totonu foi o le mea lea...

Tofa Hon Lauofo Fonotoe Nuafesili Pierre Lauofo (Anoamaa Sisifo): Lau Afioga i le Fofoga Fetalai...

FOFOGA FETALAI: Se i tulai mai le sui usufono mo Anoamaa Sisifo.

Tofa Hon Lauofo Fonotoe Nuafesili Pierre Lauofo: Se i fai se malologa a le sui usufono mamalu.

O le taimi foi lea na aoga ai Peseta i Amerika i mea ia, e le i i ai ni masini faapea. Ou te le iloa la po o fea lea e maua ai lona silafia i masini ia. Ae manaia tele, o matou nei e le malamalama foi i lea matata, e nonofo lava ma faalogologo. O lea la ua feoloolo lava si malamalama lea ua tau maua, a. Ae fesili atu i le Afioga ia Peseta, o le a le mea, i mea ia o pre-heated ma isi mau mea ia na e taua, o le a foi le mafuaaga na mama uma ai talivai a le fale foi lea o le Yazaki, lea sa e ueloina. Po o i ai se... po o le mea a na maua le masini lea e le tupu le mea lena. E pei la e taua tele le saunoaga a le sui usufono, e tatau ona aumai se tatou masini. Malo faafetai Peseta.

FOFOGA FETALAI: Malo. Ia, se i tulai mai le sui usufono mo Falealili Sasae.

Afioga Fuimaono Teo Samuelu Teo: Lau Afioga i le Fofoga Fetalai, leaga o au lea sa fesili i le amataga, o lea la e afa le faamalamalama, a ua lava a lea ou te talitonu ai e le aoga le fautuaga a Peseta lea e aumai. Aua o lona uiga o container gel le mea e faaoga i le tetele o pou. A o lea la ua saunoa Fonotoe, leaga e i ai foi le mea e tau o le over-heat. O lona uiga o le over-heat o le faavevelaga o talivai, lea e ala ai ona tutulu ma mama ai mea a le Yazaki lea na uelo e Peseta. Faafetai.

FOFOGA FETALAI: Ia, se i tulai mai le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, leai ua fai ma le alofa foi i le Afioga i le sui usufono mamalu i le faamatalaga o le masini lea. Ia o le mea lea e popole ai lou loto, ua 50, o lea o le a 60 tausaga o tutoatasi Samoa e i ai le tatou Matagaluega foi lele o le au pasi fale, o latou ia e i ai tomai o mea nei. O mea ia e saunoa i ai Peseta, atonu e talafeagai i le mea sa galue ai i Amerika e oo i le tai 20, 30, 40 fogafale. Ia manatua foi, e i ai le certain height a oo loa i le fale, ua le faaoga

le uelo ae bult, e taofi mau ai le fale, a. O le uiga o lau tala, o Pese, e tele tele i le aufai fale ma le aufai auala. Sa tatau ona ave lana tuualalo i le Afioga i le Minisita ma le tatou vaega lea e pasia fale aua o lea e pei e foliga mai foi lea... e manaia le fautuaga, ae pei o le a tau undermin ai foi le tomai o nai ia... E fesoasoani atu foi i le Afioga i le sui usufono mamalu, ae manaia foi e faaauau i se isi...

FOFOGA FETALAI: Malo faafetai, ia se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le saunoaga a le sui usufono faatoa faamaui atu nei lona tootoo, e i ai le fautuaga a le Minisita Lagolago i le Minisita, e le o au la o se inisinia. O lea la, lau Afioga i le Minisita e fautua mai ia te au, se ua lava ia lea, o le a popoto tele le vaega lea i lou faailoa, o la e faalogologo uma mai lava ma e e ono tauofo i galuega ia, e te toe tauofo atu ua e le toe maua se ofo ua atamamai uma.

O le mea la lea, see ese ia o le a popoto tele tagata tou te tauva.

FOFOGA FETALAI: Ioe. Ia, malie le Afioga se i tulai mai lava le sui usufono le la e tulai mai o... Le Minisita Lagolago o Galuega...

Susuga Seiuli Ueligitone Seiuli (Sagaga le Usoga): Lau Afioga i le Fofoga Fetalai, se o lea na saunoa le Afioga ia Peseta i le aikia lea e tatau ona apply i le faiga o pou ma mea ia... a o lau fesili i le Afioga i le Minisita Lagolago po o le Minisita Lagolago a le Palemia, o le a le mea na le apply ai le masini lea i le pa foi lea a le tatou falemai lea sa uelo e Peseta lea na tele le faaletonu foi lea o le pa a le falemai lea? Ma lou faaaloalo lava.

FOFOGA FETALAI: Se matua tou leaga tele. Ia, ou te fautua atu i le sui usufono mamalu, aua e te tali i le vaega uma le la, ae fai le fautuaga a le Palemia.

Afioga PESETA VAIFOU TEVAGAENA: Lau Afioga i le Fofoga Fetalai, o le a ou le tali i ai leaga e maumau lou taimi, leaga e leai lava ma se isi o le aualii ia e tutu mai e malamalama i mea ia ou te talanoa atu ai. Se i silasila e oo lava i alavai ae o la e fai mai e uelo. E le ueloa ni apa o ni alavai. Ioe. E oo foi i le mea lea e saunoa i ai si ou uso ia Seiuli, o mea o uamea mama e le faaaogaina i masini ia. A o le agaga lena lau Afioga i le Minisita, o le fautuaga, o le fautuaga, leaga o lea tatou te vaai i le suiga o le tau, ua eseese nei vaitaimi, ua eseese. O taimi sa le malolosi matagi o lea ua tetele. Ua tatou vaai foi i mafuie ua toetiti lava tai masina ma sau mafuie, ae lelei le fautua atu ma tapenapena atu, o lena foi e faafogafoga mai le Matagaluega, aemaise foi i latou o lo o faatinoa galuega tetele nei, e tatau

ona mataala ma silasila leaga o le ola ma le soifua o tagata, ioe, ola ma le soifua o tagata.

O se isi vaega lau Afioga...

FOFOGA FETALAI: Ia, ou te fautua atu i le sui usufono mamalu, a i ai se isi mea e toe faamalamalama, ia faamalamalama i tua i le tatou malologa, leaga o lea ua tatou taunuu i le tatou malologa.

O le a faataatiaese Galuega a le Fono Aoa mo lana malologa masani.

Na faataatiaese Taulumaga a le Fono Aoa Faitulafono mo lana malologa masani i le itula e 10:35 i le taeao ma toe faaauau i le itula e 11:30 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoa Faitulafono.

Ua i ai le manatu ua faaopoopo le malosi o le paia o le Palemene e faaauau ai le tatou galuega.

E faia le malologa o saunoa le sui usufono mo Faasaleleaga Nu.4. Ou te tapa ma le faaaloalo lau Afioga, o lea ua maea foi le taimi faatulafonoina o le saunoaga a lau Afioga i le sui usufono mamalu, ae faaiu mai le saunoaga aua le itumalo e faagasolo ai le tatou galuega.

Afioga PESETA VAIFOU TEVAGAENA: Ia, faafetai i lau Afioga i le Fofoga Fetalai, o lea foi ua maua leni faasiliga malosi. E momoli ai foi le faafetai i lau Afioga ma le Matagaluega ona o leni foi faasiliga malosi ua maua e le Palemene i leni itula o le aso.

Ae ou te le i see ese i le mea lea, e tasi lava si mea e fia tali atu lava i le tulaga lea ona o le fale lea, leaga o lea na saunoa i ai i le Yazaki. Mo le silafia foi o le fale lea, o le fale le la ua uma ona insure, o le fale lene na fausia i le 120 le windspeed o le fale lea, ma na pasia lelei e inisinia. O le mafuaaga la lene na ala ai ona pasia le galuega lene, ne i mea ua i ai se isi e toe tu mai, o lene ua ou fai atu, a na le lelei la le faatinoina o le galuega lea, e le pasia ma e le mafai foi ona faaogaina e le Yazaki, e le mafai foi ona insure.

Lau Afioga i le Fofoga Fetalai, ia, e momoli atu le faafetai, momoli foi le faafetai i le Minisita mo le Soifua Maloloina ona o le vaavaai i le fita ma le faigata foi o le galuega, aemaise foi le tele o le faalavelave ma le mau faamai o tutupu nei i si o tatou Malo, ae paga lea, e pei o lene lava ua amotasi e le

Matagaluega nei tulaga faigata. O le agaga lea o le faafetai o lenei itumalo, aemaise foi i nai alii ma tamaitai fomai ma le au tausisoifua.

E momoli foi le faafetai a lenei itumalo i le Komiti, Komiti o lo o nafa nei ma tulaga foi, aemaise lava o pasese mai fafo ma le vaavaaiga o le tatou border, ona e vaai pea ma le alofa ona o nei galuega, e pei lava foi na saunoa nisi o sui usufono, e faigata tele, aua e leai se mea e mafai ona fai pe a aafia ai ma nisi foi o i latou. E pei o le agaga lea e momoli atu ai le faafetai tele i le Taitaifono faapea foi i latou o lo o nafa ma lenei galuega faigata, e le o se galuega faigofie, o le galuega e aafia ai le maliu ma le oti, ia ona o le puipuiga lava o le saogalemu o si o tatou atunuu.

Lau Afioga i le Minisita mo Aoga, ia e momoli atu le faafetai faapitoa lau Afioga a au nei o le sui usufono o le itumalo. Ia e le po foi se lilo i lenei Maota, o le Afioga i le Minisita, o le uso tuofe ia te au, o le Matafeo foi. O maua ma le Minisita, o maua o tama fanau a Asaga. A o faalogologo mai le nuu lenei, le paia maualuga i le Aiga Sa Matafeo ma... ia, o maua lava, e tasi lava le manava ma le aluga ma te omai ai. Ioe. Po o a lava la sousou i inei i le Maota lenei, o maua lava o uso, e faapena. A o le agaga o le faafetai, ona o le talosaga a si ou nuu, la e faalogologo mai lou nuu i Asaga. Ina ua tapena le palota, sa ou oo atu i si ou nuu ma talanoa i mea foi o lo o moomia mo lenei foi Paeaiga pe a finagalo le Atua e toe tuu mai se avanoa ia te au. E 2 lava mea sa talosaga mai ai si ou nuu, o le auala galue, ma le faleaoga. Lau Afioga i le Fofoga Fetalai, masalo lava o lou nuu le nuu na muamua tatala le auala galue, ona o le tuitui pea ma ou tuitui pea i le Afioga i le Minisita i lena taimi, e faapea foi le faleaoga o si ou nuu.

E momoli lau faafetai i le tatou Malo, aemaise foi le Minsita o Aoga, ona e pei o nei talosaga, ua faafaigofie mea uma ona o le Afioga foi i le Minisita, e pei lava ona ou taua. Tasi ia auala ua faafaigofie ai ona tali mai le Malo o Amerika. Aua o le faleaoga lenei na faatupe e le Malo o Amerika. Ioe. E momoli ai foi lau faafetai i le Malo Tele ma le tatou Malo i auala eseese na mafua ai ona maua sia fesoasoani i si o matou nuu. O le mea la lea le tatou nuu, ia lototetele, o lena ua outou faafofoga...

FOFOGA FETALAI: Malo. Se i tulai mai lava le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, na o se mea e tataua ona malamalama lelei i mea ia, o fesoasoani nei mai fafo, e afua ona o faiga paaga a le tatou Malo ma Malo nei mai fafo, o i e auala mai ai latou fesoasoani e lagolago i a tatou atinae. O le ala foi lena o lea e faatu ai latou Ofisa i inei, ia faamalosi atili fesoootaiga ia vavalalata. O auala foi ia i le atu Faasaleleaga aofia ai ma le nuu o le sui usufono o lo o saunoa nei, o le agaga ia fesoootai atu i le auala faalava lea e alu ifo i uta, e alu atu lava i Fusi i Patamea, e faigofie ai ona agai i uta ma galueaiina le

laueleele. Ia e faigofie foi ona faatu ai fale i uta, aua o lena foi e alu atu ai ma le eletise. O le itu taua lea. E oo foi la i auala ia e pei ona ou taua, le auala lea i Lano ma i i Sapapalii, e faifaatasi, lea ua i polokalame a le Malo.

Ua ala ona ou taua le itu lea ina ne i le oo atu i ai i luma mai o le faiga palota, a o lea ua i totonu o le polokalame. O lona uiga, o a lava galuega e mafai ona fai i luma mai, e faaauau i tua atu. E le faapea la e ala ona fai mea ia ona o le tulaga o le faiga palota. Pe foi mai pe le toe foi mai le Faigamalo, a o mataupu ia, e tuu lava i le Atua, e silasila mai o lea e faatino a tatou galuega, e le o faia ona o ni faiga palota, a o polokalame a le Malo ia e alu lava ina ua uma le faiga palota se i tau lava i le isi faiga palota. Ma ou te faafetaia le sui usufono, ona o lea e nofo mai i i, o lo o alaala i le tatou Fonotaga, ona o le Fonotaga e saunoa ai. A o lea sa faafogafoga le Maota o avatu faanoi i ni tuatuagia a le isi vaega lea, a o lea ua sau i totonu o ata ia e pue, o la e saofafai mai le toa-fa lea i o i latou mea faa-Pati, o lea ua tia i le Fono a le Palemene a o la e ua fai latou mea faa-Pati i Samalaeulu. O lea, ia manuia a outou taumafaiga.

Lau Afioga i le Fofoga Fetalai, o lau fesoasoani atu lea, ona e ese le mea lea na ou faalogo atu o aumai e i ai ni tuatuagia po o ni faalavelave, a o mea faa-Pati lea e aofia uma ai le toa-fa lea e sau nei lea ua tuu i luga o telefoni. Ia, e le valea foi nei fanau.

Lau Afioga i le Fofoga Fetalai, o le tali atu lena e fesoasoani i le saunoaga a le sui usufono.

FOFOGA FETALAI: Se i tulai mai lava le Minisita mo Aoga, Taaloga ma Aganuu lau Afioga Loau.

Afioga Hon Loau Solamalemalo Keneti Sio (Minisita mo Aoga, Taaloga ma Aganuu): Lau Afioga i le Fofoga Fetalai... Faafetai mo le avanoa i lau Afioga. Leai ua ou tulai atu lava semeamanu o maua le avanoa, leaga o lea foi sa taua ma faafetai mai le Afioga i le sui usufono i le Minisita o Aoga ma taua ai lo ma piitaga vavalalata. E moni le sui usufono, ui o lea, o le galuega faa-Minisita e le faapito manu ia tasi, e le fai foi ma se tau i ai. O le agaga moni, e faapena ona faasoa, aemaise lava le fausiaina o faleaoga, e pei ona i ai foi le matou Matagaluega fesoasoani. A o lea ua saunoa le Afioga i le Palemia ia o le faasoa mai nai a tatou paaga Malo mai fafo ua faapena foi... O le faleaoga lea a Asaga, o le tausaga lenei, ona faapena lea. Na mulimuli lava i ai, tagata e tau mai ia te au ae le faamuamua, ae faafetai i le Afioga i le sui usufono i le taua o lea tulaga.

FOFOGA FETALAI: Malo faafetai. Ia, se i tulai mai le sui usufono, le Afioga ia Namulauulu, le Tofa i le Pule ia Namulauulu. Namulauulu Papalii Sami Leota, tulai mai.

Tofa Namulauulu Sami Leota (Faasaleleaga Nu.2): Faafetai i lau Afioga i le Fofoga Fetalai. Leai leaga e taua le vaega lea e tatau ona faamalamalama atili, leaga ua tele saunoaga i lenei taeao e agai atu i le faatinoina o le galuega uelo a le Afioga i le sui usufono mamalu. Leaga o lea sa taua le tulaga lea i le insure. O le faatinoina o galuega faa-insure, vagana ua faapena ona pasiaina. O le fale la lea e i le Yazaki ma fale uma ia sa faapea ona faatinoina e le kamupani lea sa ou galue ai ma o lo o ou galue ai pea. E le mafai ona issue ina se cover o le insurance vagana ua faia le survey. O survey nei e le faatinoina, e aumai tagata survey mai fafo e faatino. Na ona faamaonia atu le vaega lea. O tala o le lipoti lea ua tuuina mai, structurally sound fale ia a le Yazaki ae ou te le i iloa o le Afioga i le sui usufono sa faapea ona ueloina. Ma lou faaaloalo.

Ae le i faia la se survey o le pa lea na saunoa i ai Seiuli, ae na o le fale o le Yazaki. Faafetai.

FOFOGA FETALAI: Faafetai. Ia malie le sui usufono, o lea ua tatou oo i Falealili a o lea faatoa tatou toe talanoa i mea i i le Tuamasaga. Ae malie le sui usufono ua maea le taimi lena e le toe foi i tua le tatou galuega, ua uma ona faamalamalama, o lea tou te silafia ma tatou iloa, e le mafai... o le tiute foi o le kamupani insure ia o le o atu e autilo uma po o lelei mautu le lelei o mea, ne i te i ua gaugau foi latou e pei ona umia foi e Sami Leota le tulaga o le kamupani insure.

Ae talu ai o le mataupu lea, ia malo faafetai, e faasoia foi le Malo e ala foi i le tuitui a le sui usufono. Ia malo, e faapena le tulaga o le... amuia foi lou itumalo o lena ua... O ai se isi o ai sili afai sa e afu maligi lava oe o le suega o galuega ma le faaleleia o le itumalo, e te toe taumafa foi oe i ai. Taumafa lava oe i le sua o au galuega lelei sa fai.

Ae tulai mai le sui usufono e faamaea mai le saunoaga.

Afioga PESETA VAIFOU TEVAGAENA: Faafetai mo le avanoa. E momoli foi le faafetai i le Afioga i le Minisita. E pei o le agaga fiafia lea i lou nei sui usufono, ona o tulaga sa talosagaina i nisi foi o nuu o si ou itumalo.

Ia, ona ou oo mai lea i le Afioga i le Minisita o Tupe. Lau Afioga i le Minisita, e pei lava ona foi ona e faafofoga i lau uluai lauga i lenei Paeaiga ina ua pale mai. E le i masalosalo lou nei sui i lou foi valaauina, e avea ma Minisita o Tupe. O le talitonuga lava ia te au, ua leva foi ona e galue i lenei foi Matagaluega. Po o le a lava le Tala o le Tupe pe laititi pe feololo pe tele, e i ai lava le talitonuga a lou nei sui usufono, ua lava lea ma totoo e soifua ai lava le atunuu. E momoli atu ai lau faafetai tele i lau Afioga. E momoli atu foi lau faafetai tele i le Ofisa sili o Pulega o le Matagaluega ma le aufaigaluega. I le tapenaina mai o nei Tala o le Tupe mai le amataga o lenei Paeaiga, o lea lava ua tatou taunuu i le siui. E ui lava e vaai i le agaga manuia

o le atunuu ma le agaga fialia, i le lelei o la outou lufilufi ma la outou faasoaso. Aua e ui lava i nei mea, e finau atu ai le toatele o sui usufono, ae a faapea lava e le lava a tatou tupe, e le mafai ona faataunuuina. O lea lava ua matau toeitiiti lava, masalo lava ua soo uma sui usufono uma ma galuega sa manaomia e itumalo, ona o le lelei ona lufilufiina ma le faasoasoaina o tupe o le tatou atunuu. O le agaga lea e momoli atu ai le agaga fialia ma le agaga faafetai, e matua lagolagoina lava e lenei itumalo le Tala Faaopoopo o le Tupe.

Lau Afioga i le Fofoga Fetalai, ou te fia oo atu i si ou itumalo pele o Faasaleleaga Nu 4. I le afio o Sa Tuala, le paia o Faalagilagi, i le afio o lo outou Aiga Sa Vui, le falefa o lo outou aiga sa Vui. Afio foi alo o Vaafusuaga, afio Falenaoti, alaalatai oe le matua fetalai, lau fetalaiga Malaueulu. Alaalatai foi le fetalaiga ia te oe saoluma, tama ma tina matutua o si o tatou nuu, faamalo le tapuai.

O lea ua faafogafoga mai lo tatou nuu i Lano i galuega ua faataatitia e le tatou Malo, o lea ua outou molimauina, o lea ua saunoa le Taitai o le tatou Malo. O lona uiga o lea ua tapena le galuega sa manaomia e si o tatou nuu. E le na o tavale feoi le taua o lenei auala lau Afioga i le Fofoga Fetalai. E pei lava ona ou avatu i le taimi ua sola, a oo ina tafe le vai lea, e le toe o ia alo ma fanau a lenei nuu i aoga. E faapea foi i faigalotu i le Aso Sa, a oo ina sua le vai lea e le mafai ona toe sopoia. Ae pei o le agaga lea e momoli ai le agaga o le faafetai, aua e le gata foi i tulaga ia, a o le mamalu foi o le atunuu, i le agai i Sasae ma Sisifo. E pei foi o le tulaga sa i ai le afioaga o Samalaueulu, le auala laupapa ua uma ona fausia e lo tatou Malo, e faapena tulaga sa oo i si ou nuu.

O lea la, lo tatou nuu i Lano, ia faafetai i lo outou matau mai, o lena ua maea le faaiuga a le Kapeneta, o lea o le a fausia le tatou auala laupapa po o le tatou auala sima. O lena foi ua uma ona taoto foi le faleaoga e tua i ai alo ma fanau, o le agaga faafetai lea. E pei lava ona ou fai atu vaega muamua ia i se afioaga e silasila muamua i ai, o le faleaoga. O le faleaoga aua o i e maua mai ai taitai e taitaia le Malo i le lumanai. O le mea lea lo tatou nuu, faamalo faafetai, faamalo foi tapuai.

E faailoa foi i si ou nuu i Asaga, i le paia o le aiga sa Matafeo, aemaise foi o le paia i le Faalagilagi, le mamalu ia te oe Salapatu, alaalatai ai lau fetalaiga i le matua fetalai, ia te oe Lualuataua, e faapea foi lau fetalaiga Leatuavao, o le mamalu foi ia te oe Salemuliaga. Aemaise o tina ma tama ma le malosi o le tatou nuu, faamalo le tapuai. Asaga e le faagaloina pea e lou nei tagata la outou lagolago ia te au, ua 2 nei o Paeaiga o lo o aumai pea le lagolago a lo tatou nuu. Ona ou manatu lea, o ai ea lenei tagata? E pei lava ona ou fai atu, ou te le tau fesiligia lo tatou nuu, a ou taunuu atu i lo tatou nuu o au lava o le Asaga. O lona uiga e maua ia te au mea e finagalo i ai lo tatou nuu. O a mea e finagalo i ai lo tatou nuu, e taumafai lava e tatalo i lo tatou Malo. E tatalo i le Malo e faatino, a lea ua outou silasila nei i ai, ua le gata i le

matagofie o le auala galue ua faatino e le Malo, a o lea ua matau, ua tele lava ina see lo tatou nuu agai i uta. Ona o le lelei o galuega sa faatino e lo tatou Malo. O le isi vaaiga matautia foi i si o tatou nuu, a vaavaai atu i commercial ia e o mai i le tv, i le vaituloto o le tatou nuu, e ese le matagofie, e ese le matagofie, e momoli ai le faafetai ma le faamalo. O le mea lea, le tapuaiga a lo tatou nuu, e le o toe umi foi ona tau mavae foi lea o lenei Palemene, ona o atu foi lea se i tatou feiloai. Ma fai ai foi le faafetai i la outou faaaloalo. O le mea lea, ia onosai, onosai e aumai lava e le Atua le mamoe e osi ai le taulaga.

Lou nuu pele o Puapua, e masalo o lea tou te faafogafoga mai i le leo o la outou auauna, ioe, o la outou auauna. E ui lava na tatou le fevaavaaia i le tele o taimi, o le mea taua lava i le tatou nuu, o le faatino o mea o lo o manaomia e le tatou nuu. O a tatou galuega e pei ona aumai ai le talosaga, o lea ua outou matau, o le tele ma le anoanoai o talosaga a lenei tele o itumalo. E fuafua foi ia le faasoa a lo tatou Malo i ana seleni maua ma ana tupe maua. Ae aua le popole, ia e lelei lava le tatou faatino pea e tatou. Ae o lo o i ai lava o tatou laueleele ma mea e maua ai lava e tatou lotoifale e faatino ai a tatou galuega. A o la outou faaaloalo ma la outou faaeaea, e le mafai ona galo, e le mafai ona galo ia te au.

Ona faapea lea o sau faamatalaga i si ou nuu, le paia o lo outou aiga Faalagilagi, le paia o Satuala, e alalatai ai le mamalu o le nofo a ituaiga. Le mamalu ia te oe le pule Sealiimalietoa, faapea foi tulatoa saoa ma saualuma, o tina ma tama matutua, faapea foi le aumaga o lo tatou nuu. Faamalo le tapuai, faamalo le tapuai, sa ou manatu lava ae o le a i ai se isi manatu o lo tatou nuu, e toe filifili ai se tofi, e tauva i lenei faiga palota. Aepeitai, o lea lava e aumai le tofa a lo tatou nuu, e tuu mai lava le avanoa ou te nofoia le Nofoa ma ou tauva i le Nofoa o lo tatou itumalo. O lona uiga o se faaaloalo maualuga lea ia te au, o se faaaloalo e le au mauagofie. E toatele tagata atamamai, o le nuu lenei lau Afioga i le Fofoga Fetalai, e toatele e atamamai, o le toatele foi o nisi o le afioaga lenei, o e foi sa avea ma Minisita o le Palemene a Niu Sila. E oo foi i le si toeaina lea, le tama matua le sa avea foi ma taitai, le afioaga i le Tootoalii, le Afioga ia Tofilau. O se foi na avea ma Faauluuluga foi o le Malo o Amerika Samoa. O le toatele ia o tagata, o tagata taua ua tutupu mai totonu o si ou nuu. O le toatele foi o lea e i ai lo latou manatu e fia o mai i le Nofoa lenei.

Ae ou te faafetai ma ou faafetai i si ou nuu, ona o le manatu mai pea ia te au. Lau Afioga i le Fofoga Fetalai, o la e faafogafoga mai lou nuu, o le nuu lenei, o tina e faatinoina ia fuafuaga ma tofiga o le nuu lenei. Le fetalaiga ia Tiaua, faapea foi le tina ia Sealiimalietoa. O tina nei, o tina nei e faatonutonia uma lava mea uma o le nuu lenei, o tonu e fai, ma upu e fai, e fai lava e tina ia. O le ala foi lea e ala ai ona faigofie tonu i totonu o si ou nuu. E tapuai lava tapanu ma tagata uma, e oo foi i tamalii, ae lafo lava le

faatuatua i tina, e pule lava... o laua ia e toa-lua e faatonufoiauina le nuu lenei. Atonu foi e tasi lenei manuia e aumai e le Atua i totonu o si ou nuu.

O le nuu foi lenei, o lo o i ai lona talatuu, o la e faafogafoga mai lou nuu, e i ai le talatuu o si ou nuu, o le toatele foi o tagata latou te le silafia. O le tamaitai mai Fiti na o mai i si ou nuu, ma aumai lana meaalofa, o lana meaalofa lea o le i'a. O lea e manuia ai, o le ala lea e ala ai ona ou fai atu o faamanuiaga a le Atua i si ou nuu. Ioe, ae tasi lava le mea na manao i ai le loomatua, le tamaitai Fiti lea, o se teine lalelei, i na ona po. I na ona po ae le i taofia e si ou nuu na foai, a le taui lea. O le taui lea o se nuu e talialofa, e tali i manaoga. O lea la ua i ai le meaalofa lea a lenei foi tina, o taimi uma lava o tausaga uma, ua misi foi isi tausaga. E aumai ai pea le meaalofa lea i gatai o si o matou nuu, o le i'a. O le i'a foi lea, vaeane le faafogafoga a le Maota lenei, e pei lava o foliga o se tamaitai, e mumu laugutu. O lea e i ai le pese lea a lo matou nuu, e silafia lelei lava e Gatoloai, aua e tasi le la Puapua e nofo mai. E pei uma lava o foliga o... ai lava ona o mea i na ona po, e ese lava le i'a lea a si ou nuu...

FOFOGA FETALAI: Malie le sui usufono ua maea lou taimi.

Afioga PESETA VAIFOU TEVAGAENA: E pei o le agaga lea...

FOFOGA FETALAI: E lelei ona fai ma tulai mai i luga leaga o lea ta te... E i ai se mea e fia faasao lau Afioga i le sui usufono mamalu o Falelatai ma Samatau?

Afioga Taefu Lemi (Falelatai ma Samatau): Ia o lenei lava e taputapu ai le lauga a si uso a faipule nei, ma ou tuualalo atu foi i ai. Ou te matauina lava le faafoega o le Fono a lau Afioga, e pei a pai loa le sui usufono i le itumalo, ua e tuu mai lava le avanoa e saunoa ai le sui usufono. O le tatalo lau Afioga, pe leai se taimi mo e lavevea, sina 2 minute se i faamaea ai le saunoaga a le sui usufono mamalu.

O le lafo lea ma le faaaloalo lau Afioga.

FOFOGA FETALAI: Masalo o lea ua faamaea mai le saunoaga a le sui usufono. Ae silasila foi, na ou tapatapa atu lava, o le mea lea e igoa o le tautaualemau i le aganuu. Na ou tautaualemau atu lava analeila, a o lea lava e alu, o lenei toeitiiti itula o lea lava ou te tautaualemau a o lena e pule lava le sui.

Ua a? ua le o toe umi...

Afioga PESETA VAIFOU TEVAGAENA: O le agaga lena, e pei lava ona ou fai atu, o le faamanuiaga lea a le Atua i si ou nuu. O le nuu foi lenei, ina ua amata ona faatino atu auala lea ua feoi taavale, na foai fua mai lava

e le nuu lenei ona eleele ma le mauga lea e i ai e tanu atu ai le auala taavale e leai se tologi, na aumai fua lava i le Malo. O la e molimau mai si ou nuu, na aumai fua lava i lalo o le Malo e faatino uma ai auala ia, e oo lava i le Itu o tane. A o le a le mea lea e i ai nei? E fiu lava i tatou ma tagata e faaoga le mauga lea, ae pei e tupu. E pei e tupu, o lona uiga o le nuu ua faamanuia i ai le Atua ona o lana foai.

O le agaga lea lau Afioga i le Fofoga Fetalai, le tatou nuu, ia e maualuga lava la outou faaaloalo, ioe. E pei foi ona fai la tatou tala, o le taimi e maea ai foi lenei Paeaiga, ona ou foi atu foi lea e faatino le tautua, i nai nei foi aso e totoe. E pei lava ona ou fai atu, e aua le popole, o a galuega ma mea sa fuafua i lenei vaitau, o lea o le a taunuu atu tatou te galulue faatasi ma faatino ia mea foi sa finagalo i ai lo tatou nuu.

Ae le i faaiuina sau faamatalaga, lau Afioga i le Palemia po o lau Afioga foi i lau Minisita, i le taele lava o lou fatu ma le agaga maualuga o lenei sui usufono, e momoli atu ai lau faamalo ma lau faafetai tele i lau Afioga. Pe a matau atu i le 2 Paeaiga, o e filifilia pea le sui o lenei itumalo e tautua i lau Afioga ma le Matagaluega. E talitonu foi lau Afioga i le Taitai e i ai foi le taimi e lapelapea ai foi le auaunaga a lou atalii. Ae o le taua ia te au, o lenei taimi umi sa ou galue ai i lau Afioga, o le tau puepue mai o nisi o mea taua, e fau ai foi lou tulaga tautua i le Malo. O se vaaiga maoae foi lea i lau Afioga, o le tele o lou loto e faatino ai galuega, e le gata i galuega a le Malo ae faapea foi i le tatou Matagaluega.

O le agaga maualuga ma le agaga faafetai i lau Afioga i le Palemia, ona o lau faaaloalo ia te au. O lau faaaloalo maualuga foi lea i si ou itumalo. E tatou te le iloa i tofiga a le Atua, pe e te toe silasila mai ia te au pe leai. Amuia lau Afioga ma nisi foi o sui usufono mamalu foi o lenei Maota, o sui mautinoa, a o matou nei e faamoemoe lava i le Atua. O le mea lea lau Afioga i le Palemia, lau susuga i le Alo o le Malietoa Tuilaepa, ni faaletonu foi o lenei sui usufono, o le faaletonu foi lea o si ou itumalo, i se auaunaga ua le tau tamalii, ia alofa faamagalou atalii foi po o lau auauna, ae tuu i luma o le Atua le faamoemoe o le tatou Malo, o lo o i le Atua lava lana faasoa.

E momoli atu foi lau faamalo ma lau faafetai i Ofisa Sili o Pulega o si au Matagaluega, le afioga ia Agafili ma si ou tuafafine foi ia Peseta Noumea. Ua faamalo galulue, faapea foi i tatou Matagaluega uma lava, sa outou galulue faatasi ai le Afioga i le Palemia. Afioga foi i alii ma tamaitai Ofisa Sili o Pulega o Matagaluega o le tatou Malo, faamalo galulue faamalo le tapuai. E pei foi ona saunoa le Taitai i le taimi foi na faatauto ai a outou afioga foi i le faafouina o galuega, e faamoemoe lava le Atua ia te outou. E faamoemoe le Malo ia outou afioga, aua le tautuaina o le tatou Malo. O le tatalo a lou nei sui usufono, faamanuia tele le Atua ia te outou i tiute ma faiva o feagai ai. E le iloa foi i le lumanai pe oo atu i lea taimi o outou seei mai Nofoa ia, ae ua matou tapuai mai tua. O le tatalo ia maua pea le loto

malosi, foai le soifua laulelei aemaise le faatinoina o tiute ma galuega e tautua ai si o tatou Malo.

Lau Afioga i le Fofoga Fetalai, o se leo mulimuli lea o lenei itumalo, e momoli atu ai lau faamalo ma lau faafetai. Faafetai tele faafetai tele faafetai tele lava, manuia tele le Fonousu a Samoa. Soifua ma ia manuia.

Na faaalua le agaga fiafia o le Palemene i le patipati o latou aao, i le maea ai o le saunoaga a le sui usufono mo Faasaleleaga Nu 4.

FOFOGA FETALAI: Ua faamalo faafetai saunoa i le sui usufono mamalu, ua faafofoga le itumalo, ia e faapena. Tapuai mai ma le manu le itumalo, ia manuia faiva o i tatou ua faapena ona faalupe. O lupe lava na faia mai i le fuifui tatou te galulue aua upufai o Malo. Faafetai malo saunoa i le sui usufono mamalu.

O le avanoa lenei mo le sui usufono mo Palauli Sisifo. Tulai mai lau Afioga i le sui usufono mamalu mo Palauli Sisifo, Afoa Amituanai.

Afioga AFOA AMITUANAI FALEULU MAULI (Palauli Sisifo): Faafetai, ia tatou sii le faafetai ia Ieova lo tatou Atua Silisili Ese, o lo tatou Tama o afio i le lagi, ona o Lona alofa tunoa ma Lona alofa mutimutivale ia Samoa ma le lalolagi, ua tatou taunuu manuia mai ai i lenei taimi ma lenei ituaso. Ia avatu ia te ia le Viiga le Faamanu ma le Faaneetaga. Ona o Ia e ona le Mana ma le mamalu uma lava e faavavau. Ou te faafetai atu i lau Afioga i le Fofoga Fetalai, ona o lou avanoa faaauo e fai atu ai sau upu faafetai i lou itumalo pele o Palauli Sisifo po o Palauli Nu 1. E faapea foi i tuualalo ma fautuaga a Palauli Sisifo i lo tatou Malo. Mo le faaleleia o le tatou tamaoaiga aua se manuia o si o tatou atunuu pele o Samoa, ma o tatou tagata, e amata mai lava i mauga tetele seia oo i mauga iti. A tatou fanau peleina o afifio ma papaaa o Samoa nei ma tafa e fia o le lalolagi.

Ou te muamua ona ou faatalofa atu i lau Afioga i Le Ao Mamalu o le Malo ma lau Masiofo, faapea le Afioga i le Sui o le Fono o Sui Tofia ma lou faletua. Ou te faatalofa atu i lau Afioga i le Palemia ma le Kapeneta faapea ma Minisita Lagolago. Ou te faatalofa atu i le Faamasino Sili le Peresetene o Fanua ma Suafa faapea ma alii ma tamaitai o le Faamasinoga.

Ou te faatalofa atu i lau Afioga i le Fofoga Fetalai ma sui usufono mamalu o le Palemene. Ou te faatalofa atu i Ofisa Sili o Matagaluega ma Faalapotopotoga a le Malo. Ou te faatalofa atu ma ofo alofa atu i le paia o le aufaigaluega tofofi a le Atua i fatafaitauaiga e fia o Samoa aao, aemaise si ou itumalo o Palauli Sisifo Nu 1. Ou te faatalofa atu ma ou ofo alofa atu i le paia o Samoa o lo o faafofoga mai i maota ma laoa ma so o se tafa o le lalolagi. Ou te faatalofa ma ofo alofa atu, le paia aua Aiga ma a latou Tama o Tama foi ma o latou Aiga, le usoga a Tumua ma Pule, Ituuu ma Alataua, Aiga i le Tai ma le Vaa o Fonoti.

Ou te faatalofa atu ma aualofa atu foi i tatou uso i Tutuila ma Manua. Le Kovana o Amerika Samoa, ma le Faigamalo a Tutuila ma Manua. O paia aua le pulega a Faatonu, le Faamasino Sili ma le Ofisa o Faamasinoga. Le Fofoga Fetalai ma le Peresetene ma sui usufono mamalu o Maota e Lua. Le Fono Aoaofa Faitulafono a Amerika Samoa. Ua paia aua Sua ma le Vaifanua, Fofu ma Aitulagi, Itua ma Alataua, Saole ma le Launiu na Saelua. Afifio Faatuiolemotu, alaalatai Tootoo o le Faleula ma upu ia te oe le Manuatele.

Avea lenei taimi ou te faatalofa atu ai i si ou itumalo peleina o Palauli i Sisifo. E amata mai i si ou nuu peleina o Taga, afio le paia i le Salevalasi, le matua ia oe Toilolo, susu le sao ia Afoa, afio Anofale o Nuuuili, afio le fanau alii ia Notoa ma Vaimalu. Alaalatai lau tautalaga ia Faiumu, le mamalu i falefa ia Lealofi ma Tagaloo, faapea faigata ia Faletuai ma Ooiao ma upu ia oe Salemuliaga.

Ou te faatalofa atu ma ou alofa atu i faafeagaiga taulagi, faafeagaiga Rev. Simalu Kovati Tuilaepa EFKS. O le Epikopo ia Elekana Ekalesia Mamona, le tama Musika i le Ekalesia Patipati, le mamalu o le Ekalesia Aso Fitu.

Ou te faatalofa atu ma ofo alofa atu foi i si ou nuu o Salailua ma Siutu. Tulouna oe Salemuliaga, oulua matua o Tuato ma Tolovaa, lau Afioga Leuluai, susu mai alii o paepae. Tulouna oulua aiga Alosina, afio mai lau Afioga Lealaitafea, tulouna le Aiga Sa Amituanai. Susu mai lau susuga Savaiinaea.

Ou te faatalofa atu foi ma ou alofa atu i si ou nuu o Siutu, tulouna oulua suafa Mulipola, susu mai lo oulua Aiga Sa Laulu, alalatai lau fetalaiiga le Faatoafe ma le nuu faigata.

E ofo alofa atu foi i faafeagaiga taulagi ia Rev. Talosaga Hitila EFKS i Siutu, Rev. Mose Malaga o le EFKS i Salailua, Rev. Tavita Polamau o le Metotisi, Tamaolefale Uaita o le Ekalesia Patipati i Salailua.

Ou te faatalofa atu ma ou ofo alofa atu foi i si ou nuu o Foailalo, afio Letelemana ma Leaupepe, ma alo o Lilomaiava. Alaalatai le mamalu o le Falelua ma Gagaimalae. Ou te faatalofa atu foi i faafeagaiga taulagi, Rev. Selau Selau Ekalesia Metotisi, Rev. Pulemau o le EFKS.

Ou te faatalofa ma ou ofo alofa atu foi i si ou nuu o Foailuga, Afio le Matua o Tauavamea ma ou Alo o Mailata ma Moepananoa, Afio Leitualamavae ma le Tama a le Fale, Alaalatai le mamalu ia te Oe Leailaoa ma Gagaimalae. Ou te faatalofa atu foi ma ou ofo alofa atu i fata faitaulaga o feagaiga taulagi le Faafeagaiga ia Rev. Iosia le Ekalesia Metotisi, le Epikopo Vaeluaga ma Uai Ekalesia Mamona, Susuga Latoga Ekalesia Assembly, ia ma le mamalu o le Ekalesia Aso Fitu.

Ou te faatalofa atu foi i si ou nuu o Satuiatua, Afio Faatupuinati o le Sao, o le Tamatasi o le Faleupolu, Afio Tuato, Afio le Falesefulu, Afio Leilua Alo o Lilomaiava, Afio Leusoalii, Susu mai lou Tapaau o Savaiinaea ma upu ia te oe Gatai ma le Lautinalaulelei ia Gagaimalae. Ou te faatalofa ma ofo

alofa atu i Faafeagaiga taulagi, Rev Setu Pitone o le Ekalesia Metotisi faatoa ta toe feiloai pe a uma le Fono.

O paia na ma mamalu o si ou itumalo, faapea faafeagaiga taulagi o Palauli i Sisifo Nu.1 o lo o nonomanu ma tatalo i le ao ma le po aua se manuia o le itumalo faapea Samoa atoa. Faamalo, faafetai le tatalo ma le tapuaiga.

Muamua ou te fia tautala i lou lagolagoina o Tulafono e 3. O le matou fonotaga i Tumua nei, ma si ou itumalo, sa latou fautua mai ai ia te au, Afoa ia lototele. Matou te faamanuia atu ia te oe i toe taimi o lau Nofoaiga. Ia e faaleoina le tulaga o lou itumalo i lenei mataupu ona matou tautino atu lea, e te toe sau i le isi faiga palota. O le fetalaiga lea a Faletuai Toeafe, le fofoga o le itumalo sa auai i le fale i le taimi lea.

Sa faatino lava le tiute tauave o le sui usufono i le momoliina ma faaleoina o le tofa ma le faautaga mamao a Palauli Sisifo Nu.1 i le Fonousu a le Palemene o Samoa, e leai se fefe i le Palemia, e aunoa ma sou fefe i le Palemia ma le Pati o le HRPP, e pei ona sa popole ai si ou itumalo i le tausaga na tea nei 2020.

Sa ou tautino i si ou itumalo, o Afoa le latou sui usufono o Palauli i Sisifo, e toa, e le fefe i se isi, sei vagana le Atua Silisili Ese, o lo o Faavae ai Samoa, ma e le taotaomia ou manatu i ni manatu o le HRPP, po o le Palemia, e tutoatasi lava ou manatu ma au faaiuga i le finagalo o le itumalo, ma mea moni e maua ai e Samoa...

E le po se lilo, o lena sa outou faailoa mai i Televise le tou lagolago malosi i Tulafono ia e 3, ina ua maea outou feiloaiga ma le Komiti a le Palemene sa nafa ma lea mataupu. E pei ona outou silafia, ua talia le tou talosaga, ma aveeseina ai le vaega lea o le Tulafono ma tapulaa ai Sao e 5, i le Tulafono ua pasia nei. Ua uma ona siakiina isi mataupu sa outou laga, i le tatou feiloaiga i fanua, ina ua maea le tou feiloaiga ma le Komiti a le Palemene. Ua fiu si Palemia e faatali se loia e sau ma se mataupu tau fanua, o aafia ai le Tulafono se i ona solipalaina ma saei, e leai se isi na sau. Ma o le ala la lena, sa ou palota e lagolagoina Tulafono ia e 3, aua ua fulisia i ai lo tatou itumalo. O le finagalo lena o le itumalo o Palauli o Sisifo.

E tasi lava se mataupu mo le isi taimi i le lumanai, o le toe faafoi lea o le vaega lea o Faamasinoga o Iloiloga, Judicial Review, i le Faamasinoga Maualuga i le mea na i ai muamua, pe afai e foia ai le popolega ma le vaaiga perception o le a 4 ai vae o le Faigamalo ma vaivai ai le Faamasinoga, 3 Pillars of Democracy. O le mea taua, ua amatalia lea Tulafono, ma o lo o avanoa lava nisi teuteuga i le lumanai e faaleleia atili ai le Tulafono pe a manaomia e le atunuu.

O vaitaumafa ma vaipaipa o Salailua ma Siutu. I le savali a pulenuu o Salailua ma Siutu mo se fesoasoani i le faaleleia o le vaipaipa ma le vaitaumafa o Salailua, sa tulai ma savali le sui usufono, saili se fesoasoani i le Minisita o Galuega, Ofisa Sili o le Vai, SWA, Ofisa o Vai Tumaoti, Ofisa Sili o Pulega o le Matagaluega o Tina ma Tamaitai, ia ma isi. E le toe maua

ni tupe fesoasoani mai isi Ofisa ia, se i vagana ai le fesoasoani a le Malo e auala atu i le Ofisa o le Vai e toe fausia ai ni tane tetele teuvai, storage tanks, ma faaleleia ai paipa ina ia maua e tagata uma le suavai mama faaauau, e le toe pe, pe timu pe mugala, e sua pea. E ova ma le \$1,000,000 le tau o mea faapea, ma e le mafai ona faatinoina ia fesoasoani, se i vagana ua malilie autasi i ai ia lo tatou nuu, le tofa a alii ma faipule o Salailua ma Siutu, taatia atu laia i le tou filifiliga paia, pe a oo i se taimi talafeagai i le lumanai.

E fiafia tele lo tatou Malo e fesoasoani atu e auala atu i le Ofisa o le Vai, Afioga ia Seugamaalii ma le vaega, e faatino ia galuega taugata pe a outou finagalo i ai. Faafetai i le Minisita o Galuega ma le LTA i le faamaeaina o auala ma alavai i le Aoga o le Itumalo o Palauli Sisifo i Salailua i le 2019.

O lena foi sa outou faafofoga mai i le lauga a le Sui o le Malo le Tofa ia Luatamaga Leka Tuivanu i le aso o le tatalaina o le auala i Satuiatua i le masina na tea nei, fai mai ua 30 tausaga o faatali lea atinae ae o lea faatoa taunuu. Manuia i lalo o le sui usufono lenei, Afoa Amituanai Faleulu Mauli e ui lava ina le toatele nisi ma palota ia te au. E ui lava ina le vaia soo lou tino aulelei e tamaitai ia sa faasea i lena aso, ae o le mea sili ona taua, o le faatinoga o galuega lelei mo lo tatou nuu o Satuiatua. E toe momoli atu ai le faafetai tele i le Minisita o Galuega Papalii ma le LTA, le Afioga Galumalemana ma le tatou Malo mo lenei atinae taugata ma le taua.

Ou te talitonu o le a amatalia le tatou auala galue i si ou nuu pele o Foailalo faapea ai le auala i le pupu Blowhole, le mataaga lauiloa tautaua i le lalolagi i Taga e pei ona i ai fuafuaga a le Malo, e faaiu i ai galuega ae le i muta le tatou Paeaiga nei. Ona o lea ua fulisia si ou itumalo o Palauli Sisifo ou te toe foi mai, i le palota o loma nei, ma o le a faauma loa ma auala galue o totoe i Taga, Siutu ma Foailuga.

Faafetai atu i si ou itumalo, i le lagolago mai faapea le tatalo mai i si a outou sui usufono. Faafiafiaga o le Sisigafua, Salailua ma Taga. Sa faamanuiaina si ou nuu peleina o Taga, le Paia Salevalasi, le mamalu i le Falefa ma Faigata, faapea lau tautalaga Faiumu ma le Salemuliaga, i le valaaulia a le Malo e faafiafia i le Sisigafua o le 2017, ona sa o tatou feiloai ai ma fiafia ai i Petesa nei.

Malo le pepese, faafetai le tali valaau lelei, i siva ma pesega matagofie. Sa toe faamanuia foi si ou nuu o Salailua ma Siutu i le Afio o Aiga, Alaalatai Tuato ma Tolovaa, ma Salemuliaga faapea foi le Afio o Salaulu ma Suafa, Alalatai le Fetalaiga ia Faatoafe ma le Lua Faigata, i le valaaulia a le Malo e faafiafia i le Sisigafua o le 2018. Ma sa o tatou feiloai foi i Petesa ma Tiafau nei. Malo le faaeaea, faafetai le tali valaau lelei, ma siva ma pesega matagofie.

O le a ou see atu loa i mataupu taua ma ogaoga faapea tuualalo ma fautuaga i le Malo. Muamua faamai taufaafefe o le Koviti-19 ma le vailaau tui oti, vaccine poison. Ou te fia faatepa ma faamanatu i le mamalu o le Palemene lau lauga ma lau folasaga i le Palemene ia Iuni 2020. E uiga i le faamai

taufaavalea, ma le taufaafefe o le Koviti-19, lea ua matuai fefefe ai le lalolagi ma Samoa...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Ia, tulai mai le Afioga i le Palemia, se i fai si malologa a le sui usufono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ou te fautuaina le sui usufono, see ese ma lea mea o le Koviti. O lea ua uma ona fofoga le atunuu i le tulaga ua i ai ma ua matua manino lelei ia Samoa. E le tatau ona toe agai i ai se upu. O lea foi ua silafia o lo o faasilasila atu pea e le Komiti le tulaga o i ai Samoa, ma e o lo o i ai le faamoemoe pe le toe mamao ona taunuu mai lea o tui. E mo le faasaoina o tatou ua uma le taimi tatou te fai ai tala e pei e talie i le faamai, ae o le fautuaga i le sui usufono, e lelei ona see ese o lea ua malamalama lelei le atunuu.

FOFOGA FETALAI: Ia, o le fautuaga lena a le Nofoa, see ese mai i le tulaga lea aua ne i toe oo i ai le sui usufono. Ia saunoa mai le sui usufono.

Afioga AFOA AMITUANAI FALEULU MAULI: Faafetai mo le fautuaga, e taua tele le mataupu lenei. E moni ua uma ona fai le fuafuaga a lo tatou Malo ae ou te iloaina e i ai ni mataupu taua ou te...

FOFOGA FETALAI: Ua ou fautuaina, o e faalogo mai lea ua ou fai atu ua ou fautuaina? Ia see ese loa mai le mea lena.

Afioga AFOA AMITUANAI FALEULU MAULI: Ua lelei o le a faasee atu le i se isi mataupu, ae e pei ona ou taua, e taua tele foi le mataupu lea. Ae...

FOFOGA FETALAI: See i se isi mea. Se aua e te faaitaina le Fofoga Fetalai.

Afioga AFOA AMITUANAI FALEULU MAULI: Ua outou silasila mai, o le matua tele o le vaega o lau lauga e kava e le mea lea. O le a tuu i se isi taimi ae o le a sue atu.... e pau lava le mea lea ou te fia faafetai atu i le Minisita o Aoga ma le finau malosi ua toe foi uma a tatou fanau i le aoga e masani ai, semeamanu e faapenei o tapuni lava tatou aoga a nai fanau, ma ola lelei ai i le lumanai.

Malo le tofamamao le Minisita o Aoga, Loau you are surely the best, Manu Samoa administer. Ua outou vaai mai o le matua tele lava o le lauga lea e....

Afioga Alaiasa Muagututi'a Moefaauouo Malagaitutogiai Sepulona Moananu (Anoamaa Sasae): Lau Afioga i le Fofoga Fetalai...

FOFOGA FETALAI: Ia se i vavae foe se i tulai mai le sui usufono o Anoamaa Susuga ia Lufilufi, Sa Fenunuivao.

Afioga Alaiasa Muagututi'a Moefaauouo Malagaitutogiai Sepulona Moananu: Se i vavae foe se i sailiili le lauga a Palauli ia ae sa taua e le sui usufono i le taimi ua sola le tulaga foi lea o ia e le fefe i se tagata ma o ia e toa. A sau foi i totonu o le Palemene, ia ae o le agaga lava ia e tuutuualalo foi lea i sui usufono, ia taatia ia o tatou uiga toa ma uiga faapena i tua, ae a tatou omai loa i le Maota o Samoa, ia e galulue faatasi mo se lelei o le faamoemoe.

E tatou te galulue ua i ai foi Taitai ua uma ona tofofi ma mea uma faapena, e tatou te usitaia ma faalogo i ai aua le taitaiina o le Malo. Ia ma le Faalapotopotoga foi lea e pei la o le Vaega Faaupufai a le HRPP. Ia e i ai lava ia ona tulaga taua, ia e ao ona mulimulitaia e sui usufono, leaga a faafofoga mai nisi sui o taufaasauni mai i totonu, ia ona faapea lea ae o le faiga lea e alu ai ia le tatou Palemene ia ma le tatou galuega. Ia manuia le lauga a Palauli ma le agaga faaaloalo.

FOFOGA FETALAI: Malo, faafetai, ia e tonu ma sao leaga e faapena ona faauiga sese mai e nisi o sui usufono aemaise o le faafofoga tapuai mai o le atunuu. Ia e leai se agaga faapena i totonu o le Palemene e faapea e faafefe e se isi sui usufono se isi sui usufono.

E oo foi lava i upufai a Malo, o na e silasila foi i ai le sui usufono mamalu, ia e faapena. E le o tau faafefe foi le Palemia ia tatou. Ia o lea e fai le mea e finagalo i ai le sui usufono ia i lana saunoaga ae e pau o le mea ua tulai mai le Palemia e talosagaina le sui usufono e aua le toe oo i lea tulaga, o lea na e taua na e saunoa ai i i le masina o Iuni i le tausaga ua tuanai. Ia lena ogasami tele sa o tatou i ai, e na o le Koviti lava na e saunoa i ai.

O le mea la lea o lea ou te faamaumauina i i, ua ou manatu e aua tatou te toe foi i tua i lou finagalo lena. O le mea la lea ae tulai mai e leai se isi sui usufono...

Afioga Fuimaono Teo Samuelu Teo: Lau Afioga i le Fofoga Fetalai...

FOFOGA FETALAI: Ua ou manatu e faapena e faaleaga i se isi sui usufono. O tatou e galulue tatou te mulumuluafue ia maua se manuia o le atunuu. Ia e pei e faapena, ia se i tulai mai le sui usufono e faaauau...

Afioga Fuimaono Teo Samuelu Teo: Leaga o lea o le a see ese lau Afioga i le Fofoga Fetalai...

FOFOGA FETALAI: E pei o le a tosotoso i tua ae faauma mai loa le saunoaga a le sui usufono. Malie Leala e faapena foi le sui usufono o Falealili o lea ua fai le faaiuga a le Nofoa i le sui usufono mamalu...

Afioga Fuimaono Teo Samuelu Teo: Ona o le Tulafono Tumau e oo lava i upu e faaoga lau Afioga e tulai atu ai ma le agaga faaaloalo.

FOFOGA FETALAI: A foi o le Tulafono Tumau e taoto lava ae fai le faauigaga a le Fofoga Fetalai i le mea e tatou te maopoopo ai. Tulai mai le sui usufono, le sui usufono o Palauli Sisifo.

Afioga AFOA AMITUANAI FALEULU MAULI: Ia faafetai i lau Afioga i le Fofoga Fetalai. O lea sa ou tau... e a foi nei a... e toe faamanatu atu mea i vasa ua tea. Ae o le taimi lenei, o lea ua o tatou i le taimi lenei 2021, o mea ia sa ou fia talanoa i ai, o mea nei ae e pei e fai ma reflect i tua i i mea na e peisei o le tulaga na na ou taua ai...

FOFOGA FETALAI: O lo o i ai le Ofisa o le Soifua Maloloina, o la e i ai le Ofisa o le Soifua Maloloina, ma i latou o la ua tutu i luma i le tulaga o le Koviti. E malie la, o la ua uma ona tatou filifilia i latou e tutu i luma mo le faamoemoe lenei ae agai i nisi mea o le itumalo. E pei e faapena se lagona leaga o oe le sui usufono finau, ia o lea ua ou fai atu silasila foi, ou te le i tapa oe e te nofo i lalo ona o lena e faitau lau lauga.

Ia vaai la oe i mea na ou musu e fai atu ai? E sa le faitau o le lauga. E a e te fia faafofoga lea ua ou fai atu? O mea na, o mea na, se e fai foi o le avafatafata ae e faapena. O le mea lena ou te musu e tuu se avanoa i se isi sui usufono te i ua taua le itu lea. Ae faasaosao lau saunoaga, saunoa i nisi mea lelei o le itumalo o la e faafofoga mai o lea foi ua matau atu o la e finagalo le itumalo e toe filifili mai lau... amuia oe. Amuia foi le itumalo ae tulai maia oe le uso, faamagalalo se upu a le Fofoga Fetalai, leaga e i ai le taimi e tatou te o ai i le gagana tuusao, pe afai e le malamalama le sui usufono.

Ia tulai mai loa le sui usufono e faaoo atu se isi mea o le itumalo.

Afioga AFOA AMITUANAI FALEULU MAULI: Faafetai i lau Afioga i le Fofoga Fetalai, ou te fia faailoa atu o tala uma ia ou te taumafai e fai atu, e faamalie pe a faapea o i ai se tulaga o le gagana, ae o le gagana lena o lea sa talanoa ai matou e peiseai o lea ou te fai atu faapena i le tulaga na. Ae e leai se agaga foi lea e a foi nei a.... e faapea e alualua ia faamatalaga. Ia ae

peiseai o mea uma ia ou te talanoa atu ai, o mea moni ma mea ou te talitonu e aoga mo le tatou Malo ma o tatou tagata.

E pei o le ala foi lena lea sa uma ai ia le afea o si ou itumalo, ae taumafai e fesosoani atu i tulaga o mea ia sa ou talanoa atu ai. Ae e le o ni mea fau mea ia o lea ou te iloaina o mea moni e sau i totonu o le tatou Palemene. O mea moni e faamaoni lea sa ou taumafai e pei ona ou faapea e ala atu i lau lauga, e i ai foi nai fautuaga ma tuualalo e tuu atu i lo tatou Malo.

E pei ua ou iloa ai, o le taimi lena aua toe pau foi lea o lou taimi i le Palemene, e avatu ai sau tuualalo, fesoasoani i le tatou Malo. A fai la pe le faia, o le tatou Malo lava e... o le mea sili ua tuuina atu ia fautuaga ma tuualalo. E le o ni faatonuga pe faapena, ae o fautuaga, o tuualalo, aua toe pau nei o le taimi o le sui usufono e mafai ona ona talanoa faapena atu ai, e le gata i le tatou Palemene, lo tatou atunuu, ma le lalolagi atoa.

E faamalulu atu i lau Afioga i le Fofoga Fetalai pe afai ua i ai se tulaga faapena.

FOFOGA FETALAI: E leai o lena e lelei le fautuaga, ae malie le sui usufono see ese ma le mea lea tau le Koviti. Leaga o au saunoaga uma ua tuanai, i futia ua sola, o le Koviti. Ae e faamanua... e faapaia mata, e faamanua loto.

Ioe, o le mea la lea ua ou manatu ai, ia o au saunoaga foi lea na fai iinei, e te le... ia leaga o upu na o la e o isi ma fai i tua atu o le Palemene. E faafefe e ai ai, e faafefe e le Palemia sui usufono mamalu, I'm free, aisea? E faatoa free ina ua o ese? Leai, we are all free and we are still free. O lea lava e tatou te free. Ioe, ae saunoa i mea tuusao ma mea lelei.

Ae aua le saunoa foi nei i mea faauigalua faamolemole. E faapena le lagona.

Afioga AFOA AMITUANAI FALEULU MAULI: Faafetai o le tulaga lea sa ou taua ai foi le tatou Taitai le Susuga i le Palemia, ou te tautino atu i tagata nei, o la e lelei lava le tatou Palemia. O au foi lea o le Itu Agai lea ou te i ai, Itu Agai a le tatou Pati. E peiseai lava la ou te faamautinoaina le saunoaga a le tatou Palemia, e i ai le Itu Agai o le HRPP i totonu e agaia le tatou Malo. E pei e tasi lena role lea ou te alu atu ai, o le faa-Itu Agai a le tatou Pati.

O lea la e tau atu ai i le lalolagi, e sao lelei le Palemia. O lea e i ai le Itu Agai a le HRPP. E le tau manaomia lava le Itu Agai aua o lea e le i omai le Vaega lea. Ae o lea lava e finau atu lava le Itu Agai lea na tofofi e le Palemia, i mea e tatau ona fai. E pei o le agaga lena lau Afioga, ou te le o alu atu faa sui usufono, ae ou te alu atu faa-Itu Agai a le HRPP i e agaia le tatou Malo.

FOFOGA FETALAI: Faafetai, ia faamaea mai loa le saunoaga.

Afioga AFOA AMITUANAI FALEULU MAULI: Ia aua o mataupu foi lea Itu Agai, e aafia ai ia faamai, atonu e i ai se aoga o au suesuega mulimuli, na fai mai i le isi 6 masina aua e ese le taimi lena. Ia taatia ia na mea ua tea, ae o le taimi lenei, ua i ai isi mea fou lelei, e ono fesoasoani ai i le tatou Malo i le faamai lea.

Ia o lona uiga talofa e, ana le avatu nei manatu o le sui usufono, ae ou te masalo o le fofa lea o le faamai lea, e manuia ai lo tatou Malo ma o tatou tagata, a ou le faaalua atu le tulaga lena o lona uiga e tatou te... ua leai se, tusa ua le faia lau galuega. E le gata o le sui usufono, Itu Agai, ia ma tulaga foi ia e tatau ona fai. E peiseai o le faalatalata atu lea lau Afioga, a e finagalo i ai, o le a fai atu la ni fautuaga i nai mea ia e pei ona ou taua muamua.

FOFOGA FETALAI: O le Tala o le Tupe lea e tatou te talanoa i ai. O le Tala o le Tupe Faaopoopo (Nu.1), ia o itu foi nei i le aotelega ma le tulaga o le tamaoaiga, ia Faiga Faavae tau tupe a le Malo. Ia e pei o lau tusitusiga uma na e na o le Koviti, Koviti, Koviti a? Ia e pei e faapena, ia o lea ua i ai faiga faavae a le Malo, e fuafua i ai. Ae le faapea o le a e aumaia o lea faatoa iloa ai e silafia e le Malo, o la e i ai faiga faavae ua maea ona faataoto.

E le tasi foi se mafaufau o fai ai. O laua, la e latou te faia. Ioe, a o fomai foi, ia ae o lea ua fautua mai le sutesi i galuega faafomai, e pei e tasi lena itu. Se malie ia, ae afai o lou finagalo lea e pau lea o na sa e study ai ma o na e tusi, ia ua ou manatu ua tatau foi ona faamuta lau lauga. Ioe ae toe tusi se isi mea ae toe tuu atu le avanoa e te toe saunoa ai taeao.

Afioga AFOA AMITUANAI FALEULU MAULI: Faafetai e tele mataupu ia ae tasi lea mataupu taua lea e faamuamua atu, ae i ai isi mataupu e relate uma i le Tala o le Tupe ma le fautuaga mo le lelei o le tatou tamaoaiga. Ae o le taimi lenei...

FOFOGA FETALAI: Ia faasau loa le mea lena.

Afioga AFOA AMITUANAI FALEULU MAULI: E faaalua atu? E faafefea isi mea ia? E tuu se i faatoa fai taeao?

FOFOGA FETALAI: Ia, se i o tatou talanoa ai i tua i mea na.

Afioga AFOA AMITUANAI FALEULU MAULI: Ia ua lelei o le a faaalua atu le isi a?

FOFOGA FETALAI: Ia, se i tatou talanoa ai i tua i mea na. Ia faafetai.

Afioga AFOA AMITUANAI FALEULU MAULI: O le Samoa Hotel Tourism Industry, e talafeagai lava ma le... E le o po se lilo ia Samoa atoa ma le lalolagi i le mafatiaga ua feagai nei ma le tatou Tourism Industry, e

aofia ai faletalimalo, hotels, motels, beach fales, rentals properties, rental cars, faifaatoaga laiti e faatau atu ai latou faatoaga i hotels, faletalimalo, faleaiga, handicrafts, le au faatau niu, vaisalo, supoesi, talo ma ulu, luau, faiai fee, faalifu talo ma fai, le au faapau koko ma le aufaipisinisi laiti e faatau savali latou oloa i ie tie dye, le au faafiafia e sisiva ma pepese i faletalimalo ma ailao afi. Talofa e ia Samoa...

Afioga Hon Sala Fata Pinati (Minisita mo Tagata Asiasi Maimoa Mai Fafo): Lau Afioga o se avanoa faamolemole lava...

FOFOGA FETALAI: Ia, malie lau Afioga i le sui usufono, se i tulai mai lava le Minisita mo Tagata Asiasi Maimoa Mai Fafo.

Afioga Hon Sala Fata Pinati: Faafetai lava, maeu le manaia o le folasaga a lou uso a sui usufono. E i ai le pese a Vanila sa fai i aso ia e fai i mea ia o fofoga taumafa, masalo e le o maua mai e Afoa. A o le faaupuga la o le pese e faapea le faiga, Sole, ae faapea mai le tali a isi, Sole, o au, ona toe faapea mai loa o le toatele, o a mea e ai. Ona tali uma mai loa lea faapea, Susuga e silasila mai, ua i ai le sua moa ma le sua fee, ma le sua i'a, faiai fee. Sua ma le lupe, valuvalu vi. Ia o mea uma lava na. O lea la ou te fai atu ai ia Afoa, "Afoa, aumai ia te au e te sau e faamatala uma atu ai lava fofoga taumafa o le atunuu ona faasau lelei ai lea o lau lauga taeao, a o lea o le a ou tago e tusi uma atu ma avatu fuaiupu o le pese, ona ta pepese faatasi ai lea. A o le mea lava ia, o lea ua uma ona tapena le lauga e agai tonu lava i mea ia e te saunao i ai, masalo pe 2 i le 3 aso ou te lauga ai agai i mea uma ia e te fiangalo i ai, ae pese mai pea i le taimi lenei mo le silafia e le mamalu o le atunuu ma le Fonousu a Samoa. Malo lava le taumafai, toetiiti lava e lelei.

FOFOGA FETALAI: Ia, se i tulai mai lau Afioga Afoa, le sui usufono mo Palauli Sisifo.

Afioga AFOA AMITUANAI FALEULU MAULI: Faafetai Sala. O lea ou te taumafai e lagolago atu i lau Afioga i le Minisita ma le Tourism Industry ma taumafai e fai se fofo e toe faaola mai ai le tatou Industry, aua o le taimi lenei, pei ona silafia ua matua oti lava. Ua matua le gaoioi lava nai faletalimalo aua o lena tou te silafia, o le faletalimalo ma atinae nei, o le miti a le Afioga i le Palemia sa fai ina ia faatuina tatou faletalimalo. Ma o se miti, o le baby foi a le Afioga i le Palemia, o se pepe a le Palemia, ma o se atinae tele ma se atinae lelei ua avea nei ma poutu o le isi major industry lenei i le tamaoaiga o Samoa ae le i lavea Samoa ma le lalolagi i le Koviti, e taga na tau lena upu? Sa \$850milion le tupe sa maua mai le industry lea. E ala la ona ou faalauina mea ia Sala, e tau o le multiplier effect, e aafia hotels, ae sau lava i lalo e lavea uma ai ma le au faatau meaa lea. E peiseai o le ala

lena na ala ai ona ou talanoa atu foi lele i mea ia, ae le faapea o faapea ou te fia... ae o nai tagata uma nei, e lagolago ma aafia i faletalimalo. E le faapea o le a aafia ai na o tagata i faletalimalo, e aafia ai ma le tele o services ma industry lea e lagolago i ai rental cars ma mea faapena.

O le taimi la lenei, o lea ou te fai atu, a le vave tatala tatou borders, ia ua tupu le mala, ua matua oti lava le tatou industry lea. Aua a matau, tatou te iloa, e le mafai e se isi, po o le a le poto ma le atamai o le tagata, se faipisinisi ma aoga maualuluga na alu i ai, a oo loa ina tapuni le mea e sau ai le source lea o le income, \$1, le maua se \$1 le maua se mea, ia ua matua ifi lava le mea ua bankrupt. I pisinisi, ua leai se ability o nai tagata faipisinisi ma nai tagata nei e fai se mea e maua ai se tupe. E peiseai o le agaga lena lau Afioga i le Fofoga Fetalai, na ala ai ona ou taua mea nei, e fesoasoani atu i le tatou Vaega o Tupe ma le tatou Palemene ina ia fai se fofo vave e fofo ai le faafitauli lea. E pei o le agaga lena. Aua ou te manatuaina lava le...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ua uma ona faataoto uma mea ia. O le mea lea ou te fautua atu ai i le sui usufono, see ese ma le mea lea, o lea ua taoto fuafuaga a le tatou Malo. E oo foi i mea ia o tagata e asiasi maimoa mai, e le mafai le mafai ona tatala faalauaitete, o lea tatou te i ai i le tulaga o le pipisi o le variant lea tatou te faalogo soo atu i ai. Lau Afioga i le Fofoga Fetalai, o le a maumau ai lona taimi, ae agai i isi mea.

FOFOGA FETALAI: Malo faafetai. Ia, ua e faafofoga mai, leaga o lea e aumai lau fautuaga, a o lea tatou te iloa uma lava o lea ua leai ni vaalele feoi, e oo foi i vaa a lalo ia, na o vaa oloa. Ia o le a e toe fai mai nei la e le o le mea ea lena o lea e tupu? O le nusipepa lea e te faitau ai o lea foi matou te faitau ai. Ioe. Ia, a o le fautuaga, o la e foi ua silasila le Malo i nisi foi faiga e sui ai le tulaga lena ma maua ai le fesoasoani ae see atu i se isi itu. Ioe. Mata e oo atu taeao ua e sauni? Pe ua lava ia lea taimi...

Afioga AFOA AMITUANAI FALEULU MAULI: Ou te sauni lava i so o se taimi, o nei, taeao lau Afioga i le Fofoga Fetalai...

FOFOGA FETALAI: Leaga o lea ua ou mafaufau e tatau ona faamuta lou taimi leaga ua maumau le tatou taimi i lau lauga. Ioe. Ae afai e oo atu taeao ua lelei, ia o le a toe tuu atu le isi avanoa e te toe ta ai taeao. Ae leaga o lea e matau atu, o le tele o lau tapenaga, o lea ua ou faamutaina. E ui lava ina faatu mai le lafo a le Malo i le tulaga lea, ia leaga o le a tatou toe o i tua i le mea na tatou talanoa ai i le amataga o le tausaga ua tea. Ae pei e faapena se lagona, o le faiva alofilima o le Palemene o le tatou laalaa i luma. Ioe.

O le mea la lena ou te faamalulu atu ai ma ou faatoese atu foi i lau Susuga i le sui usufono aua le faafofoga mai a le itumalo i mamafa sau faamatalaga ae i le gagana tuusao lava latou, e faapena le tatou galuega leaga e tatau foi ona e logosaia sa matou taumafai atu. Ae malie, e lelei ona toe tapena lelei i le tatou lava avafatafata aua e mafai ona ou faamuta lau saunoaga, leaga o le tatou Tulafono Tumau. Afai e taua soo e se sui usufono se mea ua maea ona saunoa i ai i futia ua sola, ona tulai mai lea o se uiga faasoesa i totonu o le Palemene. O la e tusi ai upu na, uiga faasoesa. O lona uiga, o le tiute o le Fofoga Fetalai, taofi loa le lauga. Ioe. Ia silasila la oe i ai? A o lea o le a ou le taofia lau saunoaga. O le a toe tuu atu le avanoa e te tapena lelei ai mo taeao. Malie le sui usufono, ae see ese mai mea uma ia, se toe ave se upu i le itumalo. Ioe. E pei o le tulaga lea, ae ou te faamalie atu ma ou faamalulu atu, leaga a aapa loa i Tulafono Tumau, ia na ona e tulai lava e soli loa le Tulafono Tumau. O le a le Tulafono Tumau? Faitau atoa lava lau lauga. Ia ua e silasila la oe i ai?

Ae malie le sui usufono, faamagalalo se lagona o le Fofoga Fetalai, a o upu lava e matimati ai ma poupou ai le paia o le Palemene ma le tatou galuega, ae toe tapena ifo mo taeao. Tatalo i le Atua, aua e te faamoemoe ia te oe e maua ai manatu, e leai. O le Atua e maua ai lauga, o le Atua e maua ai manatu e fai ai se upu aua le faafofoga mai a le itumalo.

Ia, ae tatou te le i tolopo, ou te tapa le... Ona o lea ua tatou taunuu i le siui o le tatou galuega e tatou te manava ai i lenei aso, ae tatou te le i tolopo, ou te tapa le sui usufono mamalu mo Siumu, le Afioga ia Faalogo na te faaiiina le tatou Fonotaga i se tatalo.

Na tolopo Taulumaga a le Fono Aoao Faitulafono i le itula e 12:58 i le aoauli seia aulia le Aso Lulu, 10 Fepuari i le itula e 9:00 i le taeao.